


OBUYA BUZUBA AA KALIVARI

 Nda kulumba, Mukwesu Neville. [Mukwesu Neville waamba, “Aku longezeze, mukwesu!”—Mul.] Leza aku longezeze, Mukwesu Neville. Nda kulumba, kapati.

² Mwabuka kabotu, no beenzuma. Ncoolwe kuba kuno ku cikombelo alimwi, cifumo cino, ku belekela Mwami, mu nzila ya kukambauka Ijwi a kukombela balwazi. Nkabela Ndili lumbide maningi nkambo ka buzuba obu.

³ Elyo Nda kagambwa, mbuli mbo Nda kanjila buyo. I mukwesu wakeenda kumbele a kwaamba, “Ta ndi yandi kuba mbuli sicinsenda uteelede oyo wakaponesege.” Ngu Mukwesu Wright. Nda kamu kombela, eelyo Mwami wakamuponya cakumaninina. Elyo wa kaboola, kalila, kuzoosuka janza lyangu, a kwaamba kuti—kuti inga wayanda kulumba Mwami nkambo—nkambo ka kuponesege. Wa kali kuyanda kujoka kuti ape kulumba. Ca mana coonse. Uuli—uli kabotu caculondoka eno. Tuli lumbide ku bumboni oobo.

⁴ Elyo Charlie, yebo a Mukwesu Jeffries, ikuti na kamuyanda, amuboole aatala awa a kukkala aa zyuuno ezi kuno. Elyo muli tambwidwe loko, kutegwa kamutano iimvwi. I mukwesu umwi kuya, a Mukwesu Wood, amuboole buyo aatala awa. Muli . . . Ngaaya masena, aakubwene masyoonto awa aa cuuno cilamfu, kutegwa kamutano iimvwi pe. Nda syoma, masena aakubwene awa, alimwi, iyyi, inga mwaba batambwidwe loko kuboola a kukkala masena aaya.

⁵ Tuli boteledwe ku . . . Nda syoma ca kaambwa, ciindi cimwi, “Nda kali boteledwe cindi ni ba kaamba kuli ndime . . .” Leza akulongezeze, mukwesu. [I mukwesu waamba, “Lyoonse ndabotelwa kuba muni lya mukambausi.”—Mul.] Nda kulumba. Ndalumba, nda kulumba. “Nda kabotelwa cindi ni bakaamba kuli ndime, atu njile mu ng’anda ya Mwami.” Ncoolwe ca Munakristo a lutangalo, kuya ku ng’anda ya Mwami.

⁶ Kulanga koonse, nke bwene beenzuma bangu banji maningi baliko, cifumo cino, Nda botelwa kapati kuli eci. Nda botelwa kubona Mukwesu a Mucizi Dauch awa, kuzwa ku Ohio. Nda bona Mukwesu a Mucizi Armstrong kusule kuya, mu lweendo loonse kuzwa ku Ohio. Leza amu longezeze nyoonse, anywebo. Alimwi, oh, kulanga buyo koonse, inga wabona banji loko, inga ca baanga nciyumu kwaamba mazina abo boonse. Mucizi Hoover, twa botelwa ku kubona kuti nkoli, cifumo cino, kuzwa ku musanza mu Kentucky. Elyo Charlie a Nellie, Mukwesu Jeffries a mukwasyi wakwe, alimwi a banji loko buyo baliko, kuzwa ku dolopo.

7 Aboobo tu langila ciindi cipati mu Mwami, cifumo cino, kulangila Leza kuti atu swaane mu nzila ya kulongezya buntu bwesu a kukutauka kuli ndiswe zintu ezyo nzo tubulide.

8 Elyo mbuli mbo Ndi langa koonse ku busena, ikuti na Nda talika kwiita boonse beenzuma bangu baliko awa, inga Nda bweza kanji kuseeni, kwaamba bantu bandeene. Cindibamba kulimvwa kabotu kujoka ku cikombelo, kubona bantu boonse baliko, ba kuswaana.

9 Ino cinooli buti cindi twaa kusika ku Julu, nkabela tu kaswaangane Kuya kwa ciindi eco cipati antoomwe, ca luswaanano Lutamani lwa lyoonse, kuzyunguluka Cuuno cabwami ca Leza, alimwi a zileleleko nzyoonya ezyo nzyo twa kabambililwa toonse? Swebo, Kuya, tuyo bambwa mu kukozyanya Kwakwe, a mu cinkozya Cakwe, alimwi a Muuya Wakwe aali ndiswe, ku komba a ku Mu belekela kwa Butamani boonse, takukabi kukatala.

10 Amuyeeye buyo, taakwe cintu cili coonse nco mukonzya kuyeeya, eco nco muyanda kucita, pele eco mu ziindi zimwi mula katala kucicita. Charlie, Nda yeeyela yebo a Ndime twa kamvwima basikaale kwiinda cintu cili coonse eco nco tubotelwa kucita, mu nzila eyo, pele, nywebo mulizi, mula katala kucicita.

11 Elyo Ndila—Ndila botelwa ku—ku kweenda kwakulikwaya, kunjila mu malundu a kweenda buyo kwakulikwaya. Pele Nda katala, ciindi cimwi, yebo ula yanda kucita cintu cimwi cimbi.

12 Elyo Ndila botelwa kweenzya. Ziindi zimwi Ndi limvwa kubaanga nkukatala a ku dekela, a nsinga kazinyongene loko. Inga ndanjila buyo mu mootokala wangu a kuya kubusena, a kujatilila ku mubalo, nkeya buselemuka mu mugwagwa, kandiimba, “Nda botelwa loko kuti inga Nda amba kuteeti Ndili umwi wabo,” na cintu cimwi. Kweendelezya buyo kabotu mamvwili ayo, a kwiimba, a kusondela cituta cangu, a koongolola. Elyo, ee, kwiinda kaindi, Ndila katala, elyo mpawo Nda bweeda ku ng’anda a kutalika cintu cimwi cimbi.

13 Pele cindi twaakusika kukomba Leza mu Bwami obo bupya, ta kukabi cindi cakukatala, lyoonse ku yooba buyo—buyo cileleko, kuyabuya buyo. Pele, mubwini, tuyo cincwa mpawo. Ta tukabi mbuli mbo tubede eno. Tu yooba bwandeene, zilenge zyandeene kwiinda mbo tubede ciindi cino. Aboobo, tuli kkomene.

14 Nda kali kuyeeya buyo. Ta ndizi na Nda kasola, kuloolola eci naa pe. Mukwesu Charlie, ciindi cimwi cakainda, Nda kali ku musanza mu Kentucky a nguwe, nkabela wa kati, “Mukwesu Branham, yebo uyeeya kuti, mu Muleniamu, yebo a Ndime tuyo vwima basikaale?”

Nda kati, “Ta ndi yeeyeli boobo, Charlie.”

15 Kati, “Ee, twali kuciyanda kuba boobo maningi,” kati, “yebo—yebo uyeeya kuti tuyooba cindi twaakusika mu Mileniamu?”

Nda kati, “Peepe, taakwe cintu ciyojaigwa mu Mileniamu.”

Elyo wa kati, “Ee, twali kuciyanda buya.”

16 Nda kati, “Charlie, ino kuti Nda konzya ku kulamya kuti cimwi ciindi wakali ngulube, alimwi yebo wakakomena kuba cilenge cipati loko, mu kuba muntunsi? Sa inga wasola kwiinka, wa yanda kujoka a kubotelwa misaalo ya ngulube?”

Kati, “Peepe.”

17 Nda kati, “Bona, inga waba mupati loko kwiinda ngulube, eno, uli muntunsi, inga to yanda limbi kuba ngulube.” Nda kati, “Lino citaimuze eco a zyuulu zili kkumi, nkabela obo mbo yooba ciindi waakucincwa kuzwa awa kuya kuli obo mbo yooba. Yebo toka yandi kuba muntunsi alimwi.”

18 Mbo mbubo. Ci yooba cintu cimwi candeene. Ndili boteledwe loko ku miyeeyo ya ncico, kuziba kuti buzuba bumwi tuyo tanta aatala maningi.

19 Ee, eno, ikuti na Mwami wayanda, Munsondo iicilila, obo buyooba kutandila. . .Mpawo Ndi yoounka, kuya kubusena mu Wyoming, a mweenzuma mubotu; na kubusena mu Idaho, a mweenzuma wangu mubotu, Mukwesu Miner Arganbright, Mukwesu Clayt Sonmore, Christian Business Men.

20 Mvwiki iicilila, mvwiki kumbele lya iicilila, ngu eno; 7, Nde elede kuba mu—mu Dallas, Texas, ku Jwi lya Muswaangano mupati wa Kuponesegwa. Elyo busiku bwangu bwa kwaambaula mbwamu 7. Elyo mpawo Nda joka, kuya kutala mu Idaho a Mukwesu Arganbright a Christian Business Men. Elyo ndiza kuba a busiku bomwe ku Minneapolis, katutana kuzwa. Elyo mpawo kuswaangana komwe kwa kalimbabula ka Christian Business Men.

21 I Mwami na wayanda, Munsondo iicilila cifumo Ndi yanda kujoka kuno ku cikombelo alimwi, nkabela ikuti na cilazuminika a kuba luyando lwa Mwami. Elyo Ndi yanda kuyo kambauka aa ciiyo ca *I Kambizi Kali Mu Luwo*, ikuti na Mwami wayanda. Ci boneka kuba ku moyo wangu, mvwiki yoonse.

22 Elyo cifumo cimwi, kuseeni maningi, kutandila foo okuloko cifumo, Nda kasinsimuka nkabela Nda kajana muzeezo oyu, “Obuya buzuba aa Kalivari.” Elyo Ndali yanda kukambauka aali oyo, cifumo cino: *Obuya Buzuba Aa Kalivari*.

23 Elyo eno ku kubala oku, atu jule mu Mabbaiibbele eesu, mu Lugwalo, ku Makani mabotu aa Musalali Matayo, ku capita 27. Elyo tuyo talisya kampango ka 27 a kubala cibeela eci ca Lugwalo, kuti tu jane ntalisyo zyesu, mpawo tuyo talika ndyoonya buyo. Elyo kwamana mulimo wa kukambauka, mpawo tu yooba a mupailo wa baciswa.

²⁴ Elyo, oh, kuzwa ciindi cainda kuno, kujosya buyo, a kubambwa kwa musyobo wangu mupya wa mulimo. Nda katambula bumboni bunji bwakaambwa kuzwa ku muswaangano oyo kwiinda ngo Nda kajisi mu ciindi cili coonse kwaciindi cilamfu.

²⁵ Kuli makani aa cintu cimwi, aakuti mweelede kukwabana aa muntu, takukwe makani obo kunji kwa cigambyociinda mbo kutondezegwa. Pele, amubone, kuponesegwa kweelede kuba aa lusyomo lwa muntu cigaminina. Lino, ikuti na muntu uli jisi lusyomo. . .

²⁶ Elyo bala bona, mbuli, Muuya Uusalala kawenda atala lya bantu a kwaamba, “Zintu zili *boobo-boobo* zyakacitika. Elyo, kuti, uli *boobu-a-boobu* i zina. Alimwi uzwa ku busena buli *boobu*. Alimwi cintu cili *boobo* eco nco kacita. Alimwi ciyooba nzila *eyi*.” Alimwi kubona koonse kwaco kucitika mu nzila eyo njiyonya!

²⁷ Nekubaboobo, muntu, kakkede awa, weelede kulingula a kwaamba, “Oyo weelede kuba Leza. Nda tambula kuponesegwa kwangu.”

²⁸ Pele, mubusena bwa ceeco, muntu waamba, “Amu bikke maanza aali ndime a ku ndikombela, kutegwa Ndi ponesegwe.” Pele eyo nje nzila njo twaka kayiisigwa kuno mu America, alimwi, aboobo, ku syoma eco. Elyo eco nca Malembe ncobeni.

²⁹ Pele eco tu jana kuti, mu Africa a masena andeene, kulekela buyo cintu cimwi mbuli eco kucitika, nkamu ya bantu yoonse yazwidilila mpoonya buyo ku ciindi comwe, bala tambula kuponesegwa kwabo, nkaambo tii bakayiisigwa cintu cipati. Mwabona? Tiiba kayiisigwa akwalo kuponesegwa. Elyo mpawo cindi babona eco, ba laziba kuti kuli Leza oyo uupona. “Alimwi ikuti na Ula pona, Ngo—Ngo mupati mu bweendelezi, alimwi Ula—Ula ponya.” Elyo eco ncecico, nkaambo mbaakani yaka bikkwa kale, intalisyo, kuti Ngo musilisi, alimwi ulaponya bantu. Mpawo ciindi babona Busyu Bwakwe kabubeleka kwiinda mu Mbungano Yakwe, mpawo ba laamba, “Eco kwamana. Kwamana nko tuyanda.”

³⁰ Pele twa kayiisigwa, “ku bikka maanza aa balwazi,” a zintu mbuli obo. Ako nke kaambo ta cibeledi kabotu maningi mu America.

³¹ Lino, amuyeeye, Munsondo iicilila cifumo, Mwami na wayanda, Mukwesu Neville uyo caambilizya, mubwini. Elyo. . . i. . . *I Kambizi Kali Mu Luwo*.

³² Lino, Ndali ku mupa cindi ciniini ca kujula mu Magwalo aanu, kuli Matayo 27. Atu talike kubala i—i ku kampango ka 27, ka Makani mabotu aa Musalali Matayo. Lino atu swiilile kabotu ku kubala.

Elyo basilumamba ba mweendelezi baka njizya Jesu mu buyake bwa buleya, nkabela kwa kamubunganina impi yoonse ya basilumamba.

Elyo baka musamununa, a kumusamika ijansi ilisalalisya.

Elyo cindi noba kaluka musini wa maamwra, ba kuzambaila ku mutwe wakwe, a tete muli lyakwe. . . .
janza: elyo baka fugama ku mazwi kumbele lyakwe, a ku muweelele, ka baamba, Wabonwa, Mwaami waba Juda!

Elyo baka muswida mate, a kubweza tete, a ku muumya ndilyo aa mutwe.

. . .noba kamana ku muweelele, baka musamununa ijansi, a ku mu samika zikobela zyakwe mwini, a ku mutola kuya ku mubambula.

Elyo nibakali kuzwa, ba kajana muntu mu Kurene, wa zina lya Simoni: walo baka musungilizya kubweza ciingano cakwe.

Elyo cindi noba ka tanta, kuya ku busena butegwa Gologota, oko nko kuti, busena bwa caanza,

Ba kamupa waini kuti anywe uuvweledwe aa ndulwe: . . .cindi na kaulabila, wa kaukaka kuunywa.

Elyo baka mubambula, a kwaabana zikobela zyakwe, a ku waala zisolo: kuti cizulile eco cakaambwa aa musinsimi, Ba kaabana zikobela zyangu aakati kabo, nkabela aa cisani cangu baka waala cisolo.

. . .kkede aansii baka mulangilila awo;

Elyo bakabikka. . .a mutwe wakwe i bulembo bwa kutamizya, OYU NGU JESU I MWAAMI WA BA JUDA.

Mpawo kwa kali bafumpi bobilo baka bambulwa aa nguwe, umwi ku janza lya lulyo, a uumbi ku lumwesi.

Elyo abo—abo bakainda munsii baka musampaula, kaba gunaguna mitwe yabo,

Elyo kabaamba, Yebo wa kamwaya tempele, a kuliyaka mu mazuba otatwe, livune lwako. Ikuti na uli Mwana wa Leza, koseluka kuzwa ku ciingano.

Mbubonya abalo bapaizi bapati baka muweelele, a balembi a baalu, bakati,

Wa kafutula bamwi; takonzayi kuli futula mwini. Ikuti na walo Mwaami wa Israyeli, amu muleke eno aseluke kuzwa ku ciingano, nkabela tuyo musyoma.

Wa kasyoma muli Leza; amu vune lino, ikuti na uyo mufutula: nkambo wa kati, Ndili Mwana wa Leza.

I bafumpi abalo, abo baka bambulwa aa nguwe, bakaamba mbubonya mu meno aabo, mu meno aakwe.

Lino kuzwa ku ciindi ca sikati kwakali mudima koonse aa nyika kusika ku ciindi nilyakaungaunga.

Elyo kutandila ciindi nilyakaungaunga Jesu wa koongolola a jwi pati, kaamba, Eli, Eli, lama sabakitani? Oko nkwaamba kuti, Leza Wangu, Leza wangu, nkaambonzi yebo ncowa ndisiya?

Bamwi babo abo bakaimvwi kuya, ba kamvwa eco, kati, Oyu muntu wiita Eliasi.

Elyo mpoonya buyo umwi...kazusa, a kubweza insinsa, a kwiuzuya waini, a kuumbikka ku tete, a ku mupa kuti anywe.

I bamwi ba kati, A kube, a tubone naa Eliasi ula sika a kumufutula.

Jesu, cindi na koongolola alimwi a jwi pati, wa kafwa.

Elyo, mubone, cisitilizyo ca tempele caka deluka mu bubili kuzwa kujulu kusika aans; nkabela nyika yaka zungaana, nkabela myaala ya kaanduka;

...tubanda twa kavunuka; nkabela mibili minji ya basalali abo bakali koon yakabuka,

Elyo yakazwa mu kabanda kumane bubuke bwakwe, aku yoonjila mu muunzi uusalala, a kulibonya ku banji.

Lino cindi silutwe, alimwi abaabo bakali a nguwe, bakalangilila Jesu, baka bona muzuzumo wanyika, a zintu ezyo zyakacitwa, bakayoowa kapati, kabaamba, Nincobeni oyu wakali Mwana wa Leza.

33 Atu kotamike mitwe yesu kwakaindi buyo kaniini ku mupailo.

34 Mwami, tu lizi kuti Yebo uli Leza. Alimwi ci...Kumane kubala Ijwi eeli lisalala a lisetekene, inga tu cibona kuti bulenge Bwako tabuna cinca. Nduwe Leza lyoonse. Alimwi ciboneka kuti Jesu nata kajana lugwasyo luli loonse, cakuti Wa katolwa aa maanza mabyaabi nkabela wakaumwa calunya, a ku swidwa mate, a kusabulwa, elyo kalengelela aa ciingano, kazwa bulowa, kafwa. Elyo cakaboneka mbuli kuti kwakanyina lugwasyo, ku busena buli boonse, kusikila akwalo Wa kalila, Mwini, "Leza Wangu, Leza Wangu, nkaambonzi Yebo wa Ndi siya?"

35 Pele, Yebo ulabeleka mu ciindi eco kwaatanooli cintu cili coonse cikonzya kubeleka. Tuli pedwe kuziba, Mwami, kuti na tujisi milonga ili yoonse iitakonzyi kuzabukwa, ikuti na tujisi malundu aali oonse aatakonzyi kwiindwa wo, Leza ulikubwene kucita zintu ezyo bamwi nzoba takonzyi kucita.

36 Nduwe syazibwene, ku mulimo, nkambo Wa kalizi kaambo ka buzuba obo bwa Kalivari. Yebo, mboli Leza, Oyo uutagoli, kalizi oora eeli kuti lyeede kusika. Pele cindi no lyaka zulizigwa, mpawo Wa katondezya kuti Wa kali Leza. Wa

katondezya kuteeti Wa kali mweendelezi. Wa kazunganya nyika, nkabela basalali abo bakoonu mu bulongo bakazwa. Wa kacitya zuba kusiya cindi ca masiku, mbuli mudima wa masiku, kutondezya kuti Wa kali Leza. Pele Wa kaboneka kuba kuumuna kwa ciindi cilamfu.

³⁷ Ko tulekela, kuzwa kuli eci, kujana kumanizya oku, kuti, kufumbwa kuti ka tweenda mu Muuya, kweenzegwa aa janza lya Leza, takukwe makani kuli eco ciboneka ku lubila, nekubaboobo tu langanya Kalivari; Leza uyo ambaula mu oora lyeede, ku ciindi ceelede.

³⁸ Lino, Taata Leza, inga twa lomba kulekelelwa kwa zibi zyesu a nsotoko zyesu. Inga twalomba Muuya Wako kuti utu sololele. Ko tusololela, mbuli Nziba mboya kasololela Kabelele. Ko tubamba kuba baswiilila ku zintu zyoonse zinga zya tucitikila, kuziba eci, kuti Leza ulabeleka zintu zyoonse kabotu, alimwi tu lizi kuti ciyooba kabotu.

³⁹ Koba andiswe sunu mu kuswaangana oku. Twa lomba kuti Uyo vuna abo bali mu ciimo caku vunwa, alimwi a bayandaula lufutuko. Ko zuzya abo a Buumi Butamani, a bo bayandaula cili boobo. Twa lomba kuti Uyo ponya abo baciswa a bapengede, abo baboola, kuyandaula kuponesegwa. Elyo twa Ku lumbaizya nkambo ka ncico. Twa cilomba mu Zina lya Mwana Wako, Mufutuli wesu, Jesu Kristo. Ameni.

⁴⁰ Lino, mu kukanana cifumo eci, tu yanda kujata kumvwisya kwanu ku cibalo nce Nda sala ku kanana nkuko: *Obuya Buzuba Aa Kalivari*.

⁴¹ Ci boneka mbuli kuti inga caba mu ciindi citeelede aaniini; eci ceelede kuti mwakali muli Bwasanu Mubotu. Kalivari yeelede ku yeeyegwa mazuba oonse. Alimwi twa kamvwa kunji loko kujatikizya nkuko, kabala kunji loko kujatikizya nkuko. Bakambausi baka kambauka aali nkuko, kutalikila ku ciindi. Baimbi bakaimba kujatikizya nkuko, kwiinda mu makkalo. Basinsimi baka cisinsima, myaka iili zyuulu zyone kacitana sola kucitika, Basinsimi ba buzuba buno bakatondeka musule ku cindi no cakacitika. Ngu buzuba bupati boobu! Ngu bumwi bwa mazuba mapati maningi bwa mazuba oonse ayo Leza nga kasola kulekela kutalika aa nyika.

⁴² Elyo ikuti na mbupati maningi ku mukowa wabantu, Kalivari, Ndi yeeya kuti ncibotu kuli ndiswe kujoka a kulingula, kubona buyo eco nco caamba kuli ndiswe. Nkambo, Ndili masimpe, ku oora eeli liyaku mamanino ndyo tu pona mo, tu yandaula zintu zipati zyoonse zya Leza ezyo nzyo tukonzya kuziba. Alimwi koonse oko nko tukonzya kulingula, tuli aano ku ciyya, kubona eco cesu, a ceeco Leza nca katucitila, a kubona eco Nca kasyomezya kuli ndiswe. Elyo nce citupa kuboola ku cikombelo. Ako nke kaambo mukambausi nca kambaukila, ako nke kaambo nca balila a ku yeeya mu Lugwalo, a ku yandaula

bunanike, nkaambo ngu muzike wa buleya ku bantu ba Leza. Elyo uli mukusola kujana cintu cimwi eco ncayo. . . eco Leza ncaelede kwaamba ku bantu Bakwe, cintu cimwi ciyo bagwasya. Andiza, inga caba, kupa mulandu ku zibi zyabo, pele inga lwaba lugwasyo lwa ku babusya, kuti inga basiya zibi zyabo elyo mpawo babuke kubelekela Mwami. Elyo bakutausi beelede kuyandaula zintu ezi.

⁴³ Elyo ku buzuba obu, mbokuli kupati maningi, bumwi bwa mazuba mapati maningi, atu lange ku zintu zyoatatwe zyandeene obo buzuba nco bwa kaamba kuli ndiswe. Inga twa bweza zili myaanda. Pele, cifumo cino, Nda sala buyo zyoatatwe zyandeene, zintu zipati ezyo nzyo tuyanda kulanga, kwa maminiti masyoonto aacilila, eco Kalivari nco ya kaamba kuli ndiswe. Elyo Nda lomba kuti kuyoopo milandu kuli basizibi boonse abo baliko; ciyo bamba basalali boonse kuya ku mazwi aabo; eco ciyo bamba bantu boonse baciswa kunyamuna lusyomo lwabo kuli Leza, a kuzwa kweenda, kabaponede; basizibi boonse, bafutulwe; basikuwa boonse kujoka, a kuba bafwansoni lwabo; a basalali boonse, kutangala, a kubweza kujata kupya a bulangizi bupya.

⁴⁴ I cintu comwe, cipati ncobeni eco Kalivari nco yaamba kuli ndiswe a ku nyika, ngu, yakamana penzi lya cibi, kumalekelo. Muntu wajanwa mulandu wa cibi. Nkabela cibi cakali cisubulo eco muntu ncatali kukonzya ku bbadela. I cisubulo cakali cilemu loko kusikila kwakanyina muntu wakali kukonzya ku bbadela. Ndi la syoma ncobeni kuti Leza waka cisala nzila eyo, cakuti cisubulo ciyooba cilemu cakuti kwiina uunga uyo cibbadelela, aboobo wa kakonzya kucicita, Mwini. Lino, cisubulo ca cibi lwakali lufu. Elyo toonse twa kazyalwa mu cibi, kubambwa mu milandu, kaboola ku nyika, kwaambaula bubeji. Aboobo kwakanyina umwi wesu oyo wakeelede, na, taakwe noba kakonzya kujana muntu aa nyika oyo wakeelede.

⁴⁵ Elyo cibi tii caka talikila aansii. Cibi cakatalikila ku Julu. Lusi- . . . wakali . . . Lusifa, dyabulosi, wakali cilenge cakapedwe mulandu, nkambo ka kutaswiilila kwakwe, katana sola kulyata nyika. Cibi cakatalikila ku Julu, oko Leza nkwa kabikka Baangelo, azintu zimwi, aa mbaakani njiyonya eyo Nja kabikka bantunsi; luzibo, musamu wa luzibo, musamu wa Buumi a musamu wa luzibo, oko muntu nkwakeelede kubweza kusala kwakwe. Eylo cindi Lusifa nakapegwa bweendelezi, kuti abambe kusala kwakwe, wa kali kuyanda cintu cimwi cibotu kwiinda Leza nca kajisi. Eco caka talisyaa penzi.

⁴⁶ Elyo kwakali ceelelo ca cibi. I ceelelo cakali lufu. Lufu lwakali cisubulo. Elyo, nko kuti, inga twa njila mu makani mapati a ceeci, nkaambo Ta ndisyomi kuti kuli pele lufu lomwe. Kuli Buumi bomwe. Elyo Ndi syoma kuti muntu uujiisi Buumi Butamani takonzyi kufwa. Elyo Nda syoma kuli kunyonyoka kwa kumaninina kwa buntu obo bubisya, nkambo Bbaibbele

lya kaamba, “I buntu obo bubisya, buyoofwa ncobeni.” Kutali muntu; “i *buntu* obo bubisya.” Aboobo, Saatani uleelede kufwa ncobeni, ku nyonyoonwa kumaninide. Obo mbo Ndi tazuminani a bantu bazumina kuti boonse bayofutulwa abo baamba kuti Saatani uyo futulwa! Wa kabisya, alimwi ngu sikutalisya wa cibi. Nkabela buntu bwakwe bwakabisya; nkabela wa kali muuya. Oyo muuya uyo nyonyoonwa cakumaninina, taakwe cintu ciyo syaala ca nguwo.

⁴⁷ Elyo cindi cibi nica kauma nyika, kujoka ku matalikilo, mbuli mulembo wa mudima kauwa kuzwa ku majulu, ca kalebula nyika ncobeni. Ca kawaala zilenge zyoonse, aa nyika, a boonse bulenge bwa Leza, mu buzike. Muntu wakaba kubweendelezi bwa buzike bwa lufu, malwazi, mapenzi, buusu. Boonse bulenge bwakawa ancico. Cibi cakali cinywe eco caka lebuka nyika mu bwini. Elyo mpawo twa kabikkwa awa, kakutakwe bulangizi, nkaambo zilenge zyoonse aa nyika zya keendelezegwa kuli ncico. Elyo bantu boonse bakazyalwa aansi ba keendelezegwa kuli ncico.

⁴⁸ Aboobo, cakaleelede kuzwa ku Busena bumwi oko kwakatakwe cibi. Tii cakakonzya kuzwa ku nyika pe. Umwi wesu inga nata kanununa uumwi. Ca keelede kuzwa kuli Uumbi.

⁴⁹ Aboobo, cindi bantu no bamvwisya kuti ba kandaanisigwa kuzwa kuli Leza wabo, baka basimutuntuli. Ba koomoka. Ba kalila. Ba kafwaba. Ba katuntulika koonse, kwiinda mu malundu a kwiinda mu nkanda, kaba yandaula Muunzi oyo uuli aa muyaki a sikubamba iwakali Leza. Nkambo, wa kalizi kuti na kasola kujoka mu Busyu bwa Leza, inga bayo cibandika kumanizya a Nguwe. Pele kwakanyina nzila ya kujoka. Ba kasweeka. Tii kazi nzila yakuya, aboobo bakeenda buyo ku masena, katuntulika, kusola kujana busena bumwi obo mbo bakali kukonzya kujoka ku Busena obo. Cintu cimwi muli mbabo caka baambila kuti wa kazwa ku—ku Busena obo bwa kalondokede. Taakwe muntu mukati muno mu nkamu eyi iiboneka, cifumo cino, na mu nkamu yaku teepu ya maginetiki, oko nkoya kuunka koonse ku nyika, taakwe muntu kuno, na kufumbwa busena, pele oyo uuyandaula bulondosi obo.

⁵⁰ Yebo wabbadelela mabbiilu aako, wa yeeya, “Eco camana.” Cindi wabbadelela mabbiilu aako, mpawo kuli muntu umwi waciswa mu mukwasyi wako. Cindi bulwazi bwamana, mpawo ujisi mabbiilu aambi aa kubbadelela. I cintu citanzi ulizi, masusu aako aaba mvwi, elyo mpawo uyanda kujoka kuba mukubusyi. Nkabela kuli cintu cimwi ciindi coonse, cizumanana, elyo nkaambo ka yuwe eelyo lya cibi. Pele mu moyo wako, nkaambo kakuti uyandaula eco, ci tondezya kuti kuli Bulondosi ku busena bumwi. Busena bumwi, kuli cintu cimwi.

⁵¹ Ako nke kaambo, ziindi zinji, sunu, kuti sizibi uci tuntulika koonse. I musimbi mubotu, mukubusyi uyo gela zyooso zya masusu aakwe, kuti aboneke kubota; kusama zisani kutondezya ciimo cakwe ca buntu. Nkaambo, ngu cintu cilikke ncakonzya kujana, kujana ku busena bumwi kusola kujana cintu cimwi kuti cijoke kuli nguwe, kakuli ukonzya kupa baalumi ku musibila, kumu tambika, kukwelelezya cankwela a nguwe. Mwaalumi mukubusyi uyo cita cintu nciconya ku mwanakazi, kusola kulibamba kweebeka kuli nguwe. Basimukobo bayo yaka maanda, akwaabamba mu nzila imwi, nkaambo ayoboneka kabotu aniini kwiinda busena bwa simukobonyina. Ngu ciindi coonse, tu yandaula cintu cimwi, alimwi cintu cimwi cila zumanana kuya aniini buyo aatala aali ncico. I mulindu mukubusyi uyo jana mulindu uumbi mukubusyi kuba simpuwo kwiinda walo. I simukobo uyo jana ng'anda eyo iiboneka kabotu kwiinda yakwe. I mwanakazi uyo jana mwanakazi uumbi uusamide mu nzila imwi, eyo iiboneka kabotu kwiinda nja cita.

⁵² Ngu cintu cimwi muli ndiswe, eco ciyandaula cintu cimwi, alimwi ci tondezya kuti tuli sweekede. Tu yanda kujana cintu cimwi eco ciyo tuleta ku kukkutula, eco ciyo zuzya kabeela ako ka nzila mukati muya, nkaambo ciboneka mbuli kuti tatu konzyi kucijana. Bantunsi baka cisola mu makkalo oonse. Ba kacoomokela. Ba kalila. Ba kacita zintu zyoonse ezyo nzyo bakazi nzila ya kucita, pele nekubaboobo tii baka cijana pe, baka tuntulika koonse kwiinda mu nyika.

⁵³ Kumalekelo, buzuba bumwi, nkokuti obuya buzuba bwa Kalivari, kwakali Umwi wa kaboola kuzwa ku Bulemu. Umwi, wa Zina Iya Jesu Kristo, Mwana wa Leza, Ooyo wakazwa ku Bulemu, elyo Kalivari ya kabambwa. Obo bwakali buzuba muulo nowaka bbadelwa, nkabela penzi Iya cibi lyakamana kwa lyoonse. Elyo cakajula nzila ku zintu eezi nzyo tufwida nzala a nyota. Ca kaleta busena bwa kukkutula. Kwa kanyina muntu oyo wakasola kuswaya Kalivari, a kwiibona mu nzila mboya kabede, oyo uyooba lyoonse mbwa kabede. Zintu zyoonse nzya kasola kuyanda na kusukamina, zila zulila, cindi nasika ku busena obo.

⁵⁴ Bwakali buzuba bupati maningi, alimwi cintu cipati maningi, caka zungaanya nyika. Caka zungaanya nyika, mbuli mboya takalina zunganisigwa. Cindi Jesu nakafwa aa Kalivari aku bbadelwa penzi Iya cibi, eyi nyika ya bubi yakalebuka. I zuba lyakaunka aanso aakati ka buzuba, ya kali aa kunyongana kupati kwa kuyeeya. Nkabela mabwe aka zungaana, malundu akakwamauka, alimwi mibili ya bafu ya posomoka kuzwa ku zyuumbwe.

⁵⁵ Ino cakacita nzi? Leza waka sitikizya, aa Kalivari. Wa kayasa munyama oyo, uutegwa Saatani, kwa lyoonse. Lino wakali mukali loko kuzwa ciindi eco, nkaambo ca kaleta Mumuni ku mukowa wa bantu. Elyo kufumbwa muntu ulizi oyo munyama

wakayaswa kuti ucili mukali loko, kayavula koonse a musana wakwe uutyokede. Lino, Saatani wa kakomwa, aa Kalivari. I nyika ya katondezya kuti cakali obo.

⁵⁶ I muulo mupati maningi oyo wakasolwa ku bbadelelwa, alimwi Umwi buyo wakali kukonzya kubbadelela, kaboola a kucicita aa Kalivari. Awo mpempawo muulo mupati mpo waka bbadelelwa. Eco ncimwi ca zintu. Leza waka ciyanda. Taakwe muntu wakeelede. Taakwe muntu wakali kukonzya. Taakwe muntu wakali kukonzya kucicita. Nkabela Leza wakasika, Mwini, eelyo wakaba mu mubili wa buntu, a kupona buumi bwa muntunsi, kubweendelezi bwa kuyanda kwa muntunsi, nkabela wakabambulwa aa Kalivari. Elyo kuya, cindi Saatani nakali kuyeeya kuti Na taka cicita, Na takainda muli ncico, Wa keenda kwiinda mu Gethsemani a masunko oonse muntu uuli oonse nga kasola kuzunda. Wa keenda kwiinda muli ncico mbubonya buyo bantu boonse, pele Wa kabbadelela muulo.

⁵⁷ Elyo eco nce ca kalebula nyika. Cakali mbuli cinywe, ya kupandulwa. Ciindi dokotela napa muntu cinywe, ula saanguna kumulebula, ka cicita. Elyo cindi Leza nakapa i—i kupandulwa kwa Mbungano, nyika yakaba aa cinywe, bulenge bwaka nyongana ku kuzungaana kwa nyika. Ta cigambyi! Leza, mu mubili wa buntu, wakali kufwa. Lyakali oora eelyo nyika ndo yakali kulangila, kakuli bunji bwabo tee bakazi.

⁵⁸ Mbuli mbo cibede sunu, banji balangila zintu eezi, elyo nekubaboobo taba zizibi pe. Ta bamvwisi nzila ya mapolelo. Ba cisola kuyandaula misaalo a zintu zya nyika, kabasola kujana nzila ya mapolelo.

⁵⁹ Kwa kali, i zikwankwani zinji ezyo zya katondeka ku buzuba obo, zitondezyo zinji ncobeni zyakali kwaamba kumbele. Ca katondezegwa kumbele kwiinda ku kabelele, kwiinda ku musune, kwiinda ku nziba, a zintu ezi zyoonse, pele nekubaboobo tii caka konzya ku cinyonyoona. Tee ca kakonzya kunyonyoona kujata kwa lufu, oko Saatani nkwa kajisi aansii.

⁶⁰ I mabwe ngaonya ayo aakali kweenda cimwi ciindi, koonse akoonse aa nyika, kaayaka sulufa! Lucifa wakali mwana wa bucedo, alimwi wa keenda a nyika cindi nokwali kuyaka kwa volukkaniki. Ayo mabwe ngaonya aakatontola, cindi Jesu nakafwa aa Kalivari, akasuka busi kuzwa ku nyika.

⁶¹ I muulo waka bbadelelwa, nkabela buzike bwa Saatani bwaka dunsuka. Leza wakajosya mu maanza aa muntu, kaindi loko eco ncaakali kulangila. Ta kacili koomoka limbi. Kuuma, cindi Na katyola mazyatilo aa Saatani, kuya ku Kalivari, mazyatilo aa cibi, aa malwazi! Elyo cileta muntu uufwika oonse, aa nyika, kujoka mu Busyu bwa Leza, a zibi kujatilwa. Aleluya! Zibi zyesu zila jatilwa. Taacikwe limbi Saatani nakacili ku tusinkila kuli Leza.

62 Kuli mugwagwa mupati uubambidwe. Kuli kubambwa kwa telefooni kuya. Kuli nzila iya ku Bulemu, kulaleta bantu boonse kukonzya kusika ku nzila eyo. Ikuti na muntu uzwide cibi, ila muswaanganya ku mbaakani. Inga wa jatilwa ku cibi eco. Kutali obo buyo, pele cibi caka bbadelelwa. Oh! Yebo weelede kwaamba, “Ta ndeelede.” Masimpe, tolede, kwiina nokali kukonzya. Pele Umwi weelede wakabweza busena bwako. Uli angulukide. Yebo to ceelede kutuntulika limbi. Yebo to ceelede kuba muntu uyandaula misaalo aanze awa aa nyika.

Nkambo kuli kasensa kazwide Bulowa,
Buzwa ku nsinga zya Emanuele,
Okole basizibi nko badumpukila kungsi lya
zambangulwe,
Kusweekelwa twiimba toonse twa milandu.

63 Yebo tolede kusweeka. Kuli mugwagwa mupati, a Nzila, nkabela ila tegwa Nzila ya busalali. I basofweede taba konzyi kweendela muli njiyo. Nkambo, ulainda kwiinda mu kasensa, kusaanguna, elyo mpawo ula njila mugwagwa mupati.

64 Wa kamwaya nguzu zya Saatani. Wa kajula milyango ya ntolongo ya gehena, ku bantu boonse abo baka jalilidwe, mu nyika eyi, mu ntolongo, kabayoowa eco cindi na kafwa, cindi lufu nolwa keelede kumulimba. Aa Kalivari, Wa kajula milyango eyo iya ntolongo, akulekela bantu boonse kuti baanguluke. Yebo to ceelede ku zundwa ku cibi. Yebo to ceelede kutuula zizo zyako ku cibi, kunywa, kufweba, kuuma njuka, kubeja. Yebo inga waba uusyomeka, uululeme, a uli kabotu. Nkabela Saatani takonzyi kucita cintu a ncico, nkaambo wa jata nzila, nzila ya Buumi eyo ijatilide mu Mwaala wa Makkalo. Taakwe cintu cikonzya ku kuzunganya kuzwa kuli Nguwo. Taakwe myuwo iikonzya ku kuzunganya kuzwa kuli Njiyo. Taakwe cintu, alwalo lufu lwini, konzya ku twaandanya kuzwa ku luyando lwa Leza olo luli muli Kristo Jesu. Eco nce cintu Kalivari nco yakali kwaamba.

65 Bantu abo bakali mu buzike ba kaangululwa. Bantu abo bakali kubweendelezi bwa lufu ciindi cimwi taba cikonzyi limbi kuyooowa lufu. I muntu wakali kusukamina Muunzi, wa muyaki a sikubamba, Leza, ula konzya kweenda aa mugwagwa mupati, a kubikka busyu bwakwe ku Julu, nkaambo uli angulukide. Aleluya! Uli nunwidwe. Ta ceelede limbi kutuntulika, nkambo kuli nzila ya kuziba naa uli luzi na pe. Leza waka tupa Buumi. Zibi yesu zili maninide. Obuya buzuba aa Kalivari waka bbadelela muulo. Cindi twa bona koonse oku, tacigambyi sikuyabila nca kaamba:

Akati kakuvumbilila kwa mabwe a
milengalenga kiisiya
Mufutuli wangu wakakotama mutwe Wakwe a
kufwa.

I cisitilizyo icaka julwa caka yubununa Nzila
 Kuya ku lutangalo lwa ku Julu a buzuba
 butagoli.

⁶⁶ Abrahamu takacili kutuntulika limbi, ku cisi coonse, kuyandaula muunzi. I sizibi ta ceelede kuyeeya limbi, naa inga wafutuka na pe. I muntu uuciswa ta ceelede kuyeeya naa inga waponsegwa na pe. I cisitilizyo cijalula, aa buzuba obuya aa Kalivari, kayubununa Nzila ku kuzunda kumaninide. Leza waka tupa nguzu zya Muuya Wakwe, kupona munzila ya kuzunda ku zintu eezi zyoonse; latulomba buyo ku cisyoma. Eco cakacitika aa buzuba obuya aa Kalivari. Kwakanyina buzuba bwakali mbuli obo. Takukabi bumwi buli mbuli obo. Ta buciyandiki limbi. I muulo waka bba delelwa, nkabela twa kanununwa. Kulumbwe kuli Leza! Twa kanununwa. Nceco we. Takucikwe kuti ko katazigwa limbi koonse. Takucikwe kuyeeyela limbi a makani aa ncico. Caka gwisigwa coonse. I civumbyo cakavumbula cisitilizyo, alimwi tuli aa mugwagwa mupati, kuta cituntulika limbi, pele kusyoma a kuzumanana kweenda ncobeni. Tu leenda ncobeni moonya mu Busyu bwa Leza.

⁶⁷ Abrahamu wakalizi, a bamwi bakalizi, kuti kucindi noba kali kuyandaula Muunzi, bakalizi kuti bakali kuzwa ku Busena bumwi. Cintu cimwi cakacitika. Bakali kupona mu nyika ya kalebuka. Mizuzumo yanyika ya kaboola. Maguwo mapati aamvula akaboola. Inkondo a bujayi! I umpe a kabelele zya kalyana, na umpe wakalya kabelele, alimwi mulavu wakalya ng'ombe. Ta ciboneki kabotu pe. Kuli cintu cimwi cilubide. Wa kalizi kuti cintu cimwi cakali lubide. Bantu a munyina kujaya munyina; wisi kujaya mwana, mwana kujaya wisi. Kuli cintu cimwi cilubide. Uli mu kukomena. Uli mu kufwa. Uli mu kuyabaala. Malwazi amulimba. Uli mu bwaange. I masamu alakomena, pele kutafwika. Ala fwa. I malundu alacinca. I lwizi lulayuminina. Masena aa maanzi akakilwa kubeleka kabotu. Kuli cintu cimwi cilubide. Elyo wa kaleta busena, Muunzi oko eco nko cata kacitika limbi. Wa kalizi, ikuti na wa sola buyo kujoka mu Busyu bwa Umwi oyo waka cibamba kuti cilulame, inga uyo cibandika kumanizya a Nguwe.

⁶⁸ Oh, ino ncoolwe, sizibi, mbo cibede, cifumo cino, kuziba kuti uujisi Nzila eno. Obuya buzuba aa Kalivari bwa kajula nzila. Nkambo boonse abo basikale bakabuvwima a kubuyandaula, Kalivari yaka bupa kuli nduwe, cabuyo. Mbobuti mbonga waikaka? Mbangaye banga baikaka, kuti banjile kabungwe? Mbobuti mbonga waikaka, kuti wiisintanye aa cintu cimwi ancico, misaalo ya nyika? Nkamboonzi ku taitambula? I cisitilizyo cijula cileta muntu kujoka moonya mu Busyu bwa Leza, kakutakwe cibi aali nguwe, ca musyobo uuli oonse. Elyo ilamubikka aa mugwagwa kumbele lyakwe, ku cintu eco

nea yandaula: Julu, bulemu, luumuno, Buumi Butamani, zintu zyoonse nkoonya kumbele lyakwe.

⁶⁹ Obuya buzuba bwakali i—i luumo lwa lufu ku nguzu zya Saatani. Kwa kagozya zintu zyoonse.

⁷⁰ Elyo inga Nda Mu bona kuya; Wa kali kabelele mu Edeni, kuzwa ku cimvule nciconya eco cakazwa kuli ncico.

⁷¹ Cindi Abela, ku lusyomo, waka tuulila Leza cituuzyo cibotu loko kwiinda ca Kaini, kuleelede kuti wakaanga i—i musaansa wa magirepu mu nsingo lya kabelele, ka kakweelele ku mwaala. Kabweza i—i mwaala mu janza lyakwe, kuba sumo, a kukwelele munsu mutwe wakwe muniini, a ku mu yasaula aku kauma calunya kusikila kakafwa. Nkabela boya bwakwe bwakateta mu bulowa bwakwe bwini. Ka kabumbuluka mu bulowa bwako. Cakali cimvule.

⁷² Pele aa buzuba obuya aa Kalivari, kwakanyina kabelele ka nyika eyi, pele kakali Kabelele ka Leza, ako kakali kufwa, ka kabumbuluka mu Bulowa Bwako Keni. Wa kaumwa calunya, a kuyasaulwa, a kuumwa, a kuswidwa mate, a ku dinkaulwa, a kuba, kubakulwa mbayi, a zintu zyoonse, kwiinda ku nyika, alimwi Bulowa kabuloka kuzwa ku zyooso Zyakwe.

⁷³ Cindi kabelele ka Abela nokakafwa, ka kafwa, kwaambaula mu mwaambo oyo Abela ngwa takakonzya kumvwisya. Ka kali kulilila aansu.

⁷⁴ Elyo cindi Kabelele ka Leza noka kakafwa obuya buzuba aa Kalivari, Wa kaambaula mu mwaambo oyo cakuti kwiina muntu waka Mu mvwisya. “Leza Wangu, Leza Wangu, nkaambonzi Yebo wa Ndi siya?” Ka kali Kabelele ka Leza, ka kaumwa calunya, ka kayasaulwa.

⁷⁵ Wa kali Kabelele nkakonya ako Abela nka kajisi mu mizeezo yakwe, cindi na kabona Lunyungu lwaka syomezegwa ilwa mwanakazi. Wa kali Kabelele ako Daniele nka kabona, ako ka kakolomonwa kuzwa ku cilundu, kakutakwe maanza. Wa kali Vwili aakati ka vwili, ku musinsimi. Boonse bakali bwene kale kumbele kuti kwakazulila aa buzuba obo, obuya buzuba aa Kalivari. Eco cakaleta cintu cipati. Eco ca tyola matomeno aa Saatani.

⁷⁶ Kusaanguna, tweelede kuyandaula eco buzuba obo nco bwakaamba. Cabili, tweelede kubona eco buzuba obo nco bwatucitila, eno, eco nco bwatucitila. Lino, catatu, atu lange eco nco tweelede ku cita ku buzuba obo. Eco nco tweelede kucita na?

⁷⁷ Kusaanguna, tweelede kulanga muli ncico, nkambo mbuzuba bupati, bupati maningi bwa mazuba. Muulo wa cibi waka bbadelelwa. Inguzu zya Saatani zya kagwejaulwa.

⁷⁸ Elyo eno tu yanda kubona eco nco tweelede kumu kulumba. Lino, mu kulumba, cindi Jesu nakafwa aa Kalivari, ku Kalivari buzuba obuya, Ta kabbadelele buyo muulo wa zibi zyesu, pele

akwalo Wa kabbadelela mulandu a kubamba nzila eyo yakuti inga twa Mu tobela; nkambo swebo, mbuli kwakawa ba Adamu abo baka nununwa. Mbuli Muuya mbowa kasololela Adamu (Adamu mutaanzi) kwiinda ku Muuya, oyo wakajisi bweendelezi ku bulenge boonse, mpawo swebo (Adamu wabili), na bantu ba nyika baka nununwa aa Kristo, kuzwa ku buzuba bwa Kalivari, inga ba Mu tobela. Lino, cindi Na kafwa aa Kalivari, Wa kabamba nzila. Wa kaaba Muuya, Muuya Uusalala, cakuti wakau Ta ma kujoka aansi, nkambo ka nduwe a Ndime kuti tuponene kuli nguwo. Eco ncecico Kalivari nco yaamba kuli ndiswe, ku Mu tobela.

⁷⁹ Kusaanguna, kulanga muli ncico, kubona eco nca cakatucitila. Nkabela eno ncinzi nco tweelede kucita mu kupa kulumba kuli ncico? Ino yebo a Ndime tweelede kucita nzi?

⁸⁰ Lino, tu laamba, “Ee, Nda—Nda lumba kuli eco. Eco cili kabotu.” Pele tweelede kucitambula. Nkabela kucitambula, nku tambula Muntu Wakwe, Kristo mu myoyo yesu.

⁸¹ Mpawo, tu laangulukide ku cibi, aboobo taacikwe nketani zyakwaangwa izya cibi kazilengelela aali ndiswe, nokuceya. Leza, mbuli buyo kuteeti tii twakabisya, Cituuzyo cilondokede caka tubamba kulondoka. Nkambo, Jesu wa kati, “Aboobo nywebo amulondoke, mbubonya mbuli Uso wanu uuli ku Julu mbwa londokede.” Mpawo, taacikwe ciceelede kucitwa, pele twaka bambwa kulondoka mu Busyu bwa Leza.

⁸² Lino, awo mpo tu sweekelwa busena bwesu. Ikuti na ta tulangilili, twa sola kulanga musule kuli obo mbo twakabede. Alimwi kufumbwa kuti ka tulanga musule kuli obo mbo twakabede, Cituuzyo ta caambi cintu kuli ndiswe. Oh, sa tamukonzyi kucibona, no mbungano? [Mbunga yaamba, “Ameni.”—Mul.] Inga tii...Inga tii ndasola mulimo. Ta ndikonzyi, a yebo inga tookonzya. Taakwe kaambo kayandika kusola. Uli sweekede, kuzwa ku matalikilo, kufumbwa kuti kolanga kuli eco nco kacita. Pele utalangi kuli eco ncokacita.

⁸³ Amulange eco buzuba obo aa Kalivari nco bwaka mucitila. Bwaka bbadelele muolo wako. Bwa kamanizya penzi. “Zibi zyanu zibe mbuli kusalalapyu; zila tuba mbuli caanda. Kusubila mbuli kusalalisya; mbuli boya bwambelele.” Mpawo tokwe cibi kumaninina. Uli uuta jisi cibi cakumaninina. Tacikwe makani eci nco kacita, na eco ncocita, ucili utakwe cibi. Kufumbwa kuti wa katambula Jesu Kristo kuba Mufutuli wako, zibi zyako zila jatilwa. Kufumbwa cintu ci *lekelelwa* “cilajatilwa a kuluba makani aaco.”

⁸⁴ Mpawo ino cicita nzi? Ci lakupa, kwamana kweelela ooko, Muuya Wakwe, ku Mu tobela, a kucita mbuli Mbwa kacita, kuli bamwi abo bazumanana kutobela. Wa kali buyo Muntu omwe, Muntu uulondokede. Wa kapa buumi Bwakwe, alimwi Wa kaba mukozyanyo kuli nduwe. Lino ncizi nco tweelede kucita?

⁸⁵ Lino, cintu citaanzi nce Ndi yanda kwaamba, ngu, Jesu kwiina nakali ponena Mwini. Buumi bwakwe bwaka belekela bamwi. Nkokuti, cakulondoka, Buumi Butamani. Cindi waamba kuti ulainka ku cikombelo, nkabela ula cita zintu zibotu, eco cili kabotu. Pele cindi wali ponena buumi bwako, yebo tojisi Buumi Butamani. Buumi Butamani, nku ponena bamwi. Ca katondezya cindi ni Ca kaboola mu Kabelele ka Leza. Wa kapona, alimwi wakajisi Buumi Butamani, nkaambo Ta kali ponena Mwini. Wa kaponena bamwi. Elyo ula tambula Buumi Butamani, kwiinda mukutambula buzuba obo, alimwi yebo toeleda kucili ponena limbi. Ula ponena bambi.

⁸⁶ Muntu umwi wakati, “Mbobuti mbo ndikonzya kuzunda, a kulekela kufumbwa muntu ku kwiita mazina ayo mabi?” Yebo toli poneni. Yebo uponena bamwi, kuti ukonzye kunununa bantu. Wa ba bana. Elyo penzi lya ncico, mbungano ya luba kuti yakali bana. Uli mwana. Yebo ubweza busena bwa Kristo. Uli mwana, aboobo uta liponeni lwako. Ko ponena bamwi.

⁸⁷ “Ee, Mukwesu Branham, Inga ndaponena mukwesu *oyu*, nkaambo ncobeni muntu mubotu.” Eco tacili ncico.

⁸⁸ Ko ponena muntu oyo uukusulaika. Ko ponena muntu oyo uunga wakujaya ikuti na wakonzya. Eco ncecico nco bakacita kuli Nguwe. Ba ka Mu jaya, nkabela Wa kafwa, kuti inga Wa bafutula. Obo ngu Buumi Butamani. Cindi, yebo, nkokuti mu camba cako, ulanganya Julu mpawo. Pele ula tuula zintu zyako zini, ku zyaaba, mbuli mbelele mboipa boya bwayo. Yebo ula langilila, ku Kalivari.

⁸⁹ Nda syoma eci cila mugwasya kunjila mu busena. Eco nce cilawo, eco to bantu boonse, nco tweeleda kucita, nkuli lingula mbobede, alimwi kuti mbukanze nzi. Cikombelo, takuli kuya ku cikombelo kulizya biyo ziimbo, kwiimba nyimbo. Cikombelo mbusena bwa kululamikwa. “Lubeta lutalikila ku ng’anda ya Leza.”

⁹⁰ “Tu leelede kuliyeeya lwesu kuti tulifwide, a kupona muli Kristo.” Mpawo, Wa keelede kubamba nzila eyo njo tukonzya kutuulila bamwi ku mulimo Wakwe, ku Mu tobela. Ikuti na twa Mu tobela, tuli jisi buumi obo Mbwa kapona. Eco ncibotu loko.

⁹¹ Jesu wa kati, a ku caamba. Andi mupe buyo tubalululo tuniini aali ncico. Amu swiilile kabotu. Muta kakilwi kucibona. Jesu wa kati, ku Buzuba obo Uyo aandanya bantu, mbuli mbelele a mpongo. Nkabela Uyo amba ku mpongo, “Amwiime ku lubazu lwaku lumwesi.” Elyo ku mbelele, “Amwiime ku lubazu lwa kululyo.”

⁹² Elyo Wa kaamba ku mpongo, “Amuzwe kuli Ndime. Nkaambo, Nda kali aanzala, taakwe nomwaka Ndi sanina. Nda kali mu ntolongo, elyo tii mwaka Ndi swaya. Nda kali aaciswe, eelyo tii mwaka Ndi samika. Nda kafwide nyota, eelyo tii mwaka

Ndi pa cakunywa. Nda kali cisidwe, eelyo tii mwaka ka Ndi swaya. Aboobo, amuzwe kuli Ndime.”

⁹³ Elyo ku mbelele, Wa kati, “Nda kali aa nzala, eelyo mwaka Ndi sanina. Nda kali aa cinswe, eelyo waka Ndi pa zya kusama. Nda kali cisidwe, eelyo mwaka Ndi kutaukila.”

⁹⁴ Elyo amubone. Muta kakilwi kumvwa eci, no mbungano. Amu bambe eci mu myoyo yanu, kwa lyeonse. Ca kacitwa loko munzila ya kutamvwisya! Bantu taba ciciti nkaambo ka bulizi. I muntu uukupa cintu cimwi, nkaambo kakuti weelede ku cicita, muntu oyo uukusanina nkaambo weelede kucicita, ujisi muzeezo wakuliyanda. Ce elede kuba mbubonya buumi bwako, njiyonya micito yako.

⁹⁵ Ca kali kugambya maningi ku mbelele eezyo, cakuti zya kaamba, “Mwami, ndilili Yebo no kafwide nzala? Nkabela tii twaka kusanina Yebo. . .Ndilili Yebo no kafwide nzala, eelyo twa Ka kusanina? Ndilili Yebo nokali cinswe, eelyo twa Ka kupa zyakusama? Ndilili Yebo no Ka fwide nyota, eelyo twa Ka kupa cakunywa? Ndilili Yebo no ka cisidwe, eelyo twa kakutauka kuli Nduwe?”

⁹⁶ Ca kali kucitika maningi cilikke kuzwa ku luyando, biyo Buumi Bwako mbo kaponi muli mbabo. Leza, ko lekela bantu babone eco Kalivari nco yakatucitila, kucitika maningi kulikke.

“Ndilili Yebo, Mwami? Tii twakazi eco.”

⁹⁷ Amulange eco Jesu nca kavwiila a kwaamba, “Mbuli ku ciimo mbuli mbo mwakacitila aaba, mwaka cicitila Ndime.”

⁹⁸ Buumi bwakutaliyanda; kutali muzeezo wabili. Kutali ku kuyeeya makani aaco; pele muli fwide loko ku zintu zya nyika eyi, a kupa loko muli Kristo, a kweenda loko mu mugwagwa mupati, cakuti zintu eezi ngu cintu cili citikila buyo cilikke. Yebo ucitita buyo. Kutali kwaamba, “Ee, eno, Mwami inga, Mwami, uyanda kuti ndicite eco.” Ta cili eco. Yebo uli biyo cibeela Cakwe. Muuya Wakwe uli muli nduwe, alimwi ula lilemeka mbuli Mbwa kalilemeka. Ah! Mwa cimvwa.

⁹⁹ “Kuli nzila eyo iiboneka kabotu ku muntu, pele mamanino aayo ni nzila ya lufu.”

¹⁰⁰ “Kutali boonse abo baamba, ‘Mwami, Mwami,’ bayo njila, pele abo bacita luyando lwa Taata Wangu,” kuzwa biyo ku myoyo yabo, cakwaanguluka biyo.

¹⁰¹ Lino, obuya buzuba ku Kalivari wakabbadelela muulo, kutegwa tube munzila eyo.

¹⁰² Kutali kwaamba, “Yebo ulizi, mukamufu Jones ciindi cimwi wakali. . .Waa kamaninwa malasha, elyo Nda kanka aku muulila malasha. Nda kwaambila, Nda kabona mukwesu oyo wakabulide nsuuti, elyo Nda kanka a ku muulila nsuuti. Alelekwe Leza! Ndi Munakristo.” Oh, ma! Yebo o muntu uupengede, mucete, a sikuliyanda. Yebo uli sikuupaupa.

103 “Muta lekeli janza lya lulyo kuziba eco lya lumwesi nco licita, a lya lumwesi kuziba eco lya lulyo nco licita.” Kufwa buyo kwa kulicitikila kulikke loko muli Kristo, kusikila wacicita, munzila iili yoonse. Mbulenge bwako. Mbu pange bwako. Ula cicita, munzila iili yoonse. Ngu Buumi biyo obo bupona muli nduwe. Uli lyaabide cakumaninina ku Muuya oyo, nkabela Ula liponena Wini muli nduwe. Oh, ulamvwa Muuya oyo uulelekedwe, Buumi obo! “Kutali ndime uupona,” kaamba Paulo, “pele Kristo uupona muli ndime,” buyo cakulicitika kulikke loko.

104 “Ee, Nda kwaambila, Mukwesu Branham, tuli Banakristo kuno. Tula gwasya bantu *aaba*. Tula gwasya *balo* bantu.” Oh, ma! Mause kuli nduwe. Obo tabuli Bunakristo.

105 Bunakristo bweelede biyo kulicitika bulikke. Bu leelede kucita. Elyo ula luba buyo makani abo, makani oonse, “Ta ndaambi.” Koya, kacicite.

106 Kristo wakatuula buyo buumi Bwakwe cakumaninina kuli Leza. Wa kalipa Mwini, mbuli muzibe wa buleya, ku bantu. Wa kapa buumi Bwakwe, cabuyo. Ta keelede kucicita. Ta kacicita munzila ya kucimwa pe. Ta kaamba, “Lino, bakwesu, nywebo nyoonse mweelede kuyeeya Ndime koonse cakumaninina, nkaambo Nda boola ku mufwida.” Kwiina na kaamba ijwi kujatikizya ncico. Wa kafwa, akwalo, nkaambo wakali Leza muli Nguwe.

107 Ngu Leza muli ndinywe, ngu Leza muli ndime, eco ci tubamba kucebuka bamwi. Mbelele, ku lubazu lumwi.

108 Umwi wabo yoamba, “Ee, Mwami, Nda kacita *eci*. Elyo, Mwami, Nda kacita *eco*.”

109 Wa kati, “Amuzwe kuli Ndime, nywebo noba mucita milandu. Tii nda kamuzi.”

110 Ikuti mbungano yakonzya kusola ku boola ku masimpe eeni, kuteeti tacili cintu cimwi nco musola kucita, kuli nyanyamusya lwanu kucita. Ngu cintu cimwi eco cizyedwe muli ndinywe.

111 Ko ndijatila, mweenzuma muna Pentekoste. Ndili muna pentekoste. Pele beenzuma bana Pentekoste ba kaboola ku kasena, oko nko ceelede kuba i—i kunji kwa nyimbo zyakubinda, kulizya kwa nkamu zimwi zya baimbi, na ku kamba maanza, na nsakalala, kuti kulete koongolola. Oko nku nyanyamukwa buyo. Bala lizya mu nkamu zya baimbi kabatana kwiinka ku nkondo. Bala njizya bantu mu kunyanyamukwa kwa nkondo. Nda syoma mu nyimbo. Nda syoma mu kukamba maanza. Pele Nda syoma mu zintu eezi. Obo mbwini ncobeni. Tweelede kuba a zeezyo.

112 Pele ikuti wakasiya zintu zipati kazitacididwe, sa obo mbuumi-bwini bwa kulituula cakuti Leza ula pona muli nduwe, cakulicitikila mwini kacita eco ciluleme nkaambo cili luleme. Kuya buya buyo, tosoli akwalo kuyeeya cintu a ncico. Ku

cipona buyo. Mpawo amulangilile, mwabona eci cili mukucitika. Nywebo buyo . . . nywebo tamu . . . Muli mu mugwagwa mupati. Eco ncecico Kalivari nco ya kaamba kuli ndinywe, aa mugwagwa mupati, wakajuka obuya buzuba kuli ndinywe.

¹¹³ Lino, eno amuyeeye, tamukonzyi kuba mpongo cibeela cimwi a mbelele cibeela acimwi. Ta zisangani.

¹¹⁴ Lino, kuli bantu banji baamba, “Iyi, mulizi na cintu? Tu jisi kabunga mu nkamu yesu. Swebo, tula gwasya bacete. Tula cita *eci*.” Eco cili kabotu, pele nywebo mulizya mweembo wanu nobeni kujatikizya ncico. Ta mweelede kucita eco.

¹¹⁵ “Nywebo amucite zipo zyanu zyaluzyalu mu kaziye,” Jesu wa kaamba. Buyo kulicitikila kulikke, cintu cimwi kuli ndinywe, nkweenda buyo, kujana cakunywa ca maanzi. Mu fwide nyota. Ikuti na muntu uuli muni uufwide nyota, mula yeeya kujatikizya nguwe, awalo. I kubula kwa muntu uuli muni, nywebo mwayeeya kujatikizya nguwe mbubonya mbo munga mwacita ku kubala kwanu kwini. Elyo muta bikkili maanu kuli ncico. Amu zumanane kupona.

Lino, tamu konzyi kuba mbelele cibeela cimwi a mpongo cibeela acimwi.

¹¹⁶ Aboobo ikuti mwaamba, “Ee, mbungano yesu ijisi kabunga. Tu lapa bacete, alimwi tu lacita *eci*, a kucita *eco*, a kucita *cimbi*.”

¹¹⁷ Ikuti na muli jisi eco kakutakwe bamwi abo, Buumi bwa Kristo muli ndinywe, mu cicita ncobeni mu buyo. Jesu . . . Paulo wa kati, Bataanzi Bakorinto 13, “Nekubakuti Nda pa mbono zyangu zyoone ku kusanina bacete, alimwi akwaaba a mubili wangu kutentwa mbuli cituuzyo, taci ndigwasyi cintu.”

¹¹⁸ Lino, eci nciyumu, pele Mbwini. Mweelede kuboala ku kasimpe ako, kuziba eco Kalivari nci yaka mucitila. Tula langa kuli njiyo, a kwaamba, “Oh, iyi, eco ncibotu.” Eco tacili ncico. Ikuti Mwana wa Leza wakacita kuya Kalivari, ku kubambulwa, boonse bana abo baboola beelede kuya ku Kalivari. Ule elede akwalo kuba a Kalivari. Mweelede kuba a buzuba obuya bwa Kalivari. Nde elede kuba a buzuba bwa Kalivari. Eco cakamana penzi lya cibi. Kutali kusukana maanza a mukambausi; kutali kuzunganisigwa mu cikombelo; kutali kunjila kwiinda ku lugwalo; kutali kunjila kwiinda ku kulitaminina kwa buzumini bwa bukombi. Pele kunjila kwiinda ku Kuzyalwa. Kwiina nakapa lugwalo. Kwiina nakapa kulitaminina kwa buzumini bwa bukombi. Wa kapa Kuzyalwa. Eyo nje nzila mbo tu njila. Mpawo, kuzwa eelyo, cakulicitikila kulikke tula pona buumi bwa Bunakristo.

¹¹⁹ Lino, kwaamba kumbi. Kuba mpongo cibeela cimwi, kuba mbelele cibeela cimwi, ta zijisi cintu cili boobo. Nywebo muli mpongo na mbelele. Tamuli mpongo cibeela cimwi a mbelele cibeela acimwi. Nywebo muli mpongo na mbelele.

¹²⁰ Lino, ikuti na mucita biyo zintu zibotu, a kuyeeya kuti inga mwanjila, kwiinda kuli eco, nkokuti nokwatakaba buzuba obuya bwa Kalivari. I mulao wakapa eco. Pele, mukuti cakatola buzuba obuya bwa Kalivari, ca keelede kunjizya eco, kuti inga tu tabi biyo mamembala aa mbungano, pele bana balombe a basimbi ba Leza. Obo mbo bwakabede buzuba bwa Kalivari. Eco nco bwa kaamba kuli ndinywe, kuti mukonzye kucita, a kutobela, akulilemeka mbuli Jesu.

¹²¹ Lino, mulonga taukunki kuya aatala aansu, ku ciindi comwe. I mulonga ulakunka biyo nzila yomwe. Elyo Muuya wa Leza weenda biyo nzila yomwe. Tau sanganyi zintu a Nguwo. Weenda nzila yomwe.

¹²² Amulangilile Jesu, mu kujala. Jesu wakati, “I milimo Nje cita muyo icita ayalo, alimwi mipati loko kwiinda eyi muyo cita, nkambo Nda inka kuli Taata Wangu.”

¹²³ Ta ndili mukwaamba eci kunji loko ku mbungano kuno. Nywebo mula mvwisya. Pele Milumbe eyi ilabikwa aa mateepu. Makumi a zyuulu bala swiilila, koonse ku nyika.

¹²⁴ Ndiyo ingula mubuzyo oyo wa sikujana butongo, ndyoonya eno. Nda kaambwa kanjikanji. . . kaambilwa. Ba laamba, “Baa, sa ula syoma Bbaibbele? Jesu wa kati, ‘I milimo eyo Nje cita muyo icita ayalo, alimwi mipati loko muyo icita, nkambo Nda inka kuli Taata Wangu.’”

¹²⁵ Obo cabubyaabi mbo konzya kuba, mudaala? Nku lamfu buti kuzwa ku kutweluka nko konzya kutuntulika, a lwiiyo lwako lwa zyabukombi, nzila yako ya kumvwisya kwa miyeeyo ikwa cintu cili coonse? O mweenzuma wangu uusweekede siluzyalo, sa tokonzyi kumvwisya kuti Bbaibbele eeli lilapandululwa kumuuya?

¹²⁶ Jesu wakalumba Wisi kuti Wa ka Ci sisa kuzwa ku bayiide, a basongo, a basimaanu, a bapampu, nkabela uyo Ci yubununa ku bana bali boobu mbuli banga baboola ku Kalivari.

¹²⁷ Lino amulangilile. Jesu wa kati. Amulangilile obo Mbwa ka caamba. “I milimo eyo Nje cita,” Uli mukwiicita ndyoonya eno. “I milimo eyo nje Ndili mukucita eno, koponya balwazi, kobusya bafwide, kojula meso aa boofu, eyi milimo muyo icita ayalo. Muyo cita ezi ikuti na mula syoma muli Ndime. Amucite milimo eyi. Elyo mpawo mipati loko kwiinda eyi muyo icita, nkambo Nda inka kuli Taata Wangu.”

¹²⁸ “I kaindi kaniini, eyo nyika taika Ndi boni limbi, nekubaboobo muyo Ndi bona. Njo oba a ndinywe, akwalo muli ndinywe, kusika ku mamananino aa nyika. Ta ndika musiyi mbuli bamusyaala. Njo lombwa Taata; Uyo tuma Mugwasyi uumbi, oyo uuli Muuya Uusalala, walo nyika ngo takonzyi kutambula; nekubaboobo, nywebo mulakonzya ku Mu tambula.”

129 Lino amubone. I milimo “mipati” kwiinda, kwakeelede kuba Inguzu mu Mbungano, kutali buyo kuponya balwazi kwiinda ku mipailo, kutanda badyabulosi kwiinda ku mipailo, pele kupa kucitika kwa Buumi Butamani ku basyomi. I Muuya Uusalala wakali kuza buza, a kupegwa mu maanza aa Mbungano, kupa kucitika kwa Buumi. Oh! Eco ncecico Kalivari nco ya kapandulula. Ya kasondele, baalumi a banakazi bakasampaukide, a ku basumpula kunjila busena, kuba bana balombe a basimbi iba Leza, kuponya balwazi a kupa kucitika kwa Buumi Butamani; kwiinda ku kupa Muuya Uusalala ku basyomi baswiilila, bantu bakatali basyomi ciindi cimwi, kubambwa kuba basyomi, a kupa kucitika zya kumuuya, Buumi Butamani. Mbobuti mbocili cipati loko, kwaamba . . .

130 I mwanakazi mulwazi uulede awo, inga Nda komba mupailo wa lusyomo nkabela uyo ponesege. Eco ncintu cipati. Eco ncecico Nca kali kucita kaindi.

131 “Pele,” kati, “mipati loko kwiinda eyi muyo icita. Ndiyo mupa Inguzu, kutali buyo ku mubusya kwa kaindi kaniini, pele ku mupa Buumi Butamani, obo buyooba Butamani, kwalyonse.” Bantu, boofu, bacete abapengede, mbobuti mbo mukakilwa kumvwa eco? Sena tamuboni eci cintu “cipati” loko nco caamba? Eco nce cintu cipati loko cinga casola kucitika, cakali ca kupa kucitika Buumi Butamani ku bantu. Niinzi Buumi Butamani? I Buumi obo Mbwa kaponi, Buumi obo bwakali muli Nguwe, akupa kucitika Eco kuli bamwi. Sa inga muntu wacita eco? I mwana wa Leza inga wacita.

132 Jesu wa kati, “Kufumbwa bantu mbo mujatila zibi, kuli mbabo zya jatilwa; kufumbwa bantu abo bazibi nzo mwatajatilwa, balo zino bajisi.”

133 Lino mpaawa mbungano ya Katolika a bamwi banji mpo bakapanga bulubizi bupati. Ba launka akwaamba, “Nda kujatila zibi zyako.” Eco tee cakali ncico.

134 Mbobuti mbo bakajatila zibi, mu Bbaibbele? Petro wakaingula mubuzyo, aa Buzuba bwa Pentekoste. Ba kati, “Ino tucite buti kuti tufutulwe? Mbobuti mbo tukonzya kujana Eci nyoonse nco mujisi?” Wa kabamba nzila ya bulailizi. Wa ka baambila cakucita.

135 Wa kati, “Amusanduke, umwi aumwi wanu, kuya kuli Leza, a kubapatizigwa mu Zina lya Jesu Kristo.” Kwa nzi? I kujatilwa kwa zibi zyanu. Njeeyo milimo “mipati” loko.

136 Mbangaye, nywebo no bakambausi cifumo cino, mbangaye, nywebo no muswiilila ku Ijwi lyangu aa teepu ya amagnetiki, bali bambilide kwiinka ku Kalivari cifumo cino? A kulanga eco Leza ncaka mucitila kuya. A kusiya tunsiyansiya twanu twa tubungwe, a kukambauka Makani mabotu. Aleluya! Cili ku mulimo wanu eno. Ino muyo citanzi aa Nci conya?

¹³⁷ “Nkambo kweempwa a kujailwa kwa zibi kweelede ku kambaukwa mu Zina Lyakwe, ku nyika yoonse, kutalikila ku Jerusalema.” Aleluya! Bulemu! Nceeco we.

¹³⁸ Ino Kalivari caambanzi sunu? Ino obuya buzuba inga bwamucitila nzi? Sena bwaka mutukumika, a lwiyo lumwi lwa zyangombi? Sena caka mubamba mu cilengwa cakulisumpula? Na caka mubamba kuba Banakristo, bakalyaaba? Aleluya!

¹³⁹ Cibi, cakajatilwa! “Milimo mipati loko kwiinda eyi muyo icita.” Mwabona abo ba “nywebo” mbobabede, sa mwacita? “Milimo mipati loko muyo cita eyi,” kujatila zibi, mu Zina lya Jesu Kristo.

¹⁴⁰ Pele kwiinda mu tunsiyansiya a tubungwe, a zimwi zimbi, ca mwaanga aansu ku busena, mu cibelekela nyika. Amu ndaambile kufumbwa muntu, amu ndaambile kufumbwa mwanakazi, ukonzya kusika ku Kalivari akusola kuba mubotu umwi mulemu nkaambo muntu umwi wakaamba cintu cimwi. Amu ndaambile awo mpo konzya kulanga mu busyu bwa Kalivari, mu mumuni wawo uululeme, obuya buzuba mu Kalivari. Mbobuti mbo mukonzya kuba a buzuba bwanu aa Kalivari, a kuzwa kamubambidwe a cilengwa cakulisumpula? Mbobuti mbonga wazwa kobambidwe kuba sikweendelezegwa wa kabunga kamwi, a ku kambauka njiisyo zimwi zya kabambwa aa bantu? Nkaambonzi taci kubambi kubomba ku Ijwi lya Leza? Ikuti na wasola kusika kuya, uyoozwa koli mubombe. Mbobuti mbonga wayanda kuba dundumuntule mu kabunga kako, a mulimba mu ngowani yako, kakuli Jesu Kristo Mwana wa Leza wakalibombya Mwini ku mubili wa kaumwa calunya, ku busyu bwakaswidwe mate, kusikila cakaba buusu a kufwisyansononi? Nkabela ba ka mu samununa zisani Zyakwe, a ku Mu bambula, kumbele lya nyika. “Kuusya buusu.” Mbobuti mbonga waya ku Kalivari a kuzwa cintu cili coonse candeene kwiinda Mbwa kabede, bweeme, a buusu?

“Oh,” yebo waamba, “bayo nditanda.” Ba leke batande.

¹⁴¹ Ko tambula buzuba bwako aa Kalivari, Leza uyooba a nzila Yakwe kuli nduwe. Andi balulule eco alimwi. Ko tambula buzuba bwako aa Kalivari, Leza uyooba a nzila Yakwe kuli nduwe.

Atu kombe.

¹⁴² Mwami, O Leza, ko tutola toonse kutala ku Kalivari ndyoonya eno. A tuzwe ku kuliyaanda, Mwami, kuyoowa bantu, kuyoowa eco muntu umwi uumbi nca yooamba. Baa, inyika yoonse yaka Mu seka, yaka Mu fubaazy. Pele Wa kaswiilila, ku lufu. Wa kaswiilila, ku mause. Wa kaswiilila, akwalo kubweendelezi bwa mfulumende mpati.

¹⁴³ Elyo twa mvwisya kuti ciindi Saatani nakauma nyika, wa kaba mweendelezi a bwami mu nyika eyi. Wa kapa bumboni mbubonya kumbele lya Mwami wesu, a kwaamba, “Aya mami

ngaangu. Njo cita angawo eco nco Ndi yanda.” Elyo tu lamvwisya eco, kuzwa buzuba obo kusika kuli eyi, eyi nyika, kungsi a lutuko, ya keendelezegwa a umwi oyo wakasinganya.

Pele, Leza, O Leza, tu belekela Bwami obo butakwe lutuko.

¹⁴⁴ Taata, Leza, obo mbocili cibotu loko, kuti Wa cita zintu zimwi zipati mu—mu nyika ya zipekupeku sunu. Kulekela zipekupeku eezi zipati, mbuli *Milao Ili Kkumi*, a zimwi zimbi, kuzibisigwa, kulekela baalumi a banakazi kubona, eci tacikonzyi akwalo kutantamuna mulyango wa cikombelo, pele kubalekela kubona eco mbo cibede. Nzila ya Leza ni nzila iikakidwe, ku nyika. Nkaambo tuli mbuli . . . Tu yamu Russia ku bweendelezi bwa kkomunizimu.

¹⁴⁵ Tuli mu nyika eyi, pele ta tuli ba nyika pe. Twa unka ku Kalivari. Twa libambula tobeni, nkambo ka Bwami bwa Leza, kuba bamwi Bakwe. Tacikwe makani eco nyika nco yaamba, tu tola nzila ya bace ba Mwami ibasampaulwa. Tula zumanana kuya ku bubuke, alimwi tula syoma kuti eco cili aafwi kucitika, Mwami, mane cindi notuyo busigwa mu Bwami obo buyo tola bweendelezi ku nyika eyi. Mbuli Daniele mbwa kacibwene kumbele, nkabela bwaka mwayaula nyika yoonse, mu buungu buniini, alimwi guwo lya kabufulida kuzwa ku cipolelo ca mainza cakupupulwida. Pele, cilundu, Bbwe lya kakomena kuba cilundu cipati eco cakavumba nyika. Eelyo Bbwe liyo boola. O Leza, tu yanda kuba cibeela ca ndilyo. Tulekele tu lyuubaule lwesu, kubweza ciingano cesu mazuba oonse, kuponena Kristo, kuponena bamwi. Ko cipa, Mwami.

¹⁴⁶ Ku yooba bamwi kuno cifumo eci, elyo abo bata Mu zyi mbuli Mufutuli, elyo inga ba yanda kwiibalukwa mu mupailo wa kujala, elyo inga ba yanda obu kuba buzuba bwabo bwa Kalivari, inga mwatambika maanza aanu, a kwaamba, “Ko ndikombela, Mukwesu Branham. Ndi yanda ku Mu zyiba mbuli Mufutuli wangu.” Leza aku longezye, mwaalumi mukubusyi. Muntu umwi uumbi? Leza aku longezye, mukwesu wangu kusule kuya.

¹⁴⁷ Sa inga kwaba muntu umwi uumbi? Kwaamba, “Ndi yanda ku Mu zyiba. Ndi yanda obu kuba buzuba bwa Kalivari, kuli ndime. Nda cimwa a kukatala. Ino cigwasya nzi kuli ndime kutuntulika kwabuyo koonse kuno a cintu nciconya eco nce Nda kazyalilwa kucita? Nda kazyalwa, kazyalwa kuba mwana wa Leza, nkabela ano Ndili jatilide ku zintu zya nyika. Leza, andi bambulwe sunu. Andi bambule, sunu, lwangu a mizeezo yangu, kuti inga Nda pona a Kristo, a kuponena bamwi. Takukwe makani eco nco bacita kuli ndime, ku ndifuubaazya, a kundi penzya, a ku ndaamba bubi boonse, a zintu, andi zuminane buyo kweenda cabubombe, a lubombo, mbuli kabelele, mbuli Mbwa kacita. Elyo buzuba bumwi, Wa kasyomezya kundi busya alimwi, ku Buzuba bwa mamanino. Ndi langila Buzuba oobo.”

Sa inga kwaba amwi maanza aunka mujulu? Leza aku longezye kusule kuya, a nduwe. Ncibotu. Bamwi bambi biyo...Leza aku longezye. Leza aku longezye. Bamwi bambi, abo notutana ku komba.

¹⁴⁸ Taata wesu Wakujulu, ca kaambwa, cindi Petro naka kambauka aa Buzuba bwa Pentekoste, “Mbuli boonse baka syoma bakayungizigwa ku Mbungano.” Baka syoma ncobeni a myoyo yabo yoonse. Aba bantu bazwaa kutambika maanza aabo, Nda syoma kuti basyoma a myoyo yabo yoonse. Elyo ikuti na bacita, kuli ciziba ca maanzi cilindila awa. Ba yanda zibi eezyo kuti zijatilwe. Kuli muntu umwi kuno ukonzya ku babapatizya mu Zina, alimwi Zina lyomwe eelyo lili kuni aa Julu lipedwe aakati ka bantu, oko nko tweeledede kufutulwa.

¹⁴⁹ Nkambo, mbuli mbo Nda balulula Lugwalo maminiti masyoonto aainda, kuti, “Kweempwa a kujatilwa zibi kweelede ku kambauka mu Zina Lyakwe, ku nyika yoonse, kutalikila ku Jerusalema.” Elyo ku Jerusalema, cindi kweempwa a kujatilwa zibi nokwaka kambauka, muapostolo wa kabaambila zya Magwalo, a kwaamba kuti beelede, “kweempwa, kusaanguna, elyo mpawo ba bapatizigwe mu Zina lya Jesu Kristo.” Oyo wakali mulimo wa mukambausi kucita. Nkambo balo kuti beempwe, a walo ku babapatizya nkambo ka kujatilwa kwa zibi zyabo. “Kufumbwa bantu mbo mwajatila zibi, kuli mbabo zya jatilwa; kufumbwa bantu mbomwa tajatila, balo zinobajisi.”

¹⁵⁰ Taata, mbobuti nyika mbo yakasola kuzwa mucuimo cakunyongana kutakwe bunyone mbuli mbo bajisi? Nkaambonzi kutasyoma Makani mabotu alabumvwe kabotu? Alimwi akwalo bala njizya, kuli eco, kusintanya: mazina abubeji, lubapatizyo lwa bubeji, lubapatizyo lwa Muuya Uusalala lwabubeji, kusukana maanza a bakutausi, kubelesya mabande aa Taata, Mwana, Muuya Uusalala, eco citamo mu Magwalo; pepa lya bulembo ilya kabambwa aa bantu bana Roma, kutali lwiiyo lwa Bunakristo lutako mu Bbaibbele. Kujatilwa kwa zibi takukonzyi kulekelelwa kwiinda mu bubande, cita kwiinda mu Zina lya Jesu Kristo.

¹⁵¹ Lino, Taata, tu lizyi kuti tocikwe mpuwo loko. Nzila Zyako lyoonse zyakali mu nzila eyo. Pele kolekela baalumi a banakazi, cifumo eci, kuboola ku buzuba obuya, obuya buzuba ku Kalivari. Oko, Jesu, kuubausya buzuba obuya, obo buusu, ku samununwa zisana, kuti aumwe calunya, kuswidwa mate, a kufubaazigwa; kwiinda ku nyika yoonse, kwiinda ku mbugano, kwiinda ku bantu abo ba keelede ku Mu yanda. Alimwi, nekubaboobo, muli koonse oko, Taakwe na kajula mulomo Wakwe, nkabela wakaunka a kufwida bantu abo bakali ku Mu fubaazyia.

¹⁵² Leza, ko tutola ku Kalivari cifumo cino. Alimwi ikuti na baamba kuti tuli sondokede, ba laamba twa kaimpya kumvwisya

Magwalo, kufumbwa cintu nco bayanda kwaamba, Leza, taba konzyi kwiima mu Busyu bwa Leza a kwaamba kuti cili lubide.

Taba konzyi kusisa zibi zyabo kwiinda ku Bbaibbele. I Bbaibbele lila yubununa zibi zyabo: kutasyoma kwabo; kuyanda kuba basimpuwo; kucita mbuli bamwi ba nkamu zya bantu. Ba lekele ba boole ku Kalivari cifumo cino.

¹⁵³ “Elyo kutalikila ku Jerusalema; kuti kweempwa a kujatilwa kwa zibi kweelede ku kambaukwa mu Zina Lyakwe ku masi oonse, kutalikila ku Jerusalema.”

Ko balekela batole ntaamo eyo njiyonya ya kubambulwa kuti baumwe calunya; a kuswidwa mate; a kufubaazigwa; a kwiitwa zintu zyoonse nze bakonzya kwiita mu nzila ya buzangi bwa bukombi; sikumwaya wa mabungano; koonse nko bayanda kwiita.

Akube kuti swebo, Mwami, cifumo eci, kusala nzila a basyoonto basampaulwa iba Mwami. Akube kuti tweende mbuli baapostolo mbo bakacita, kuta nyonena ku lulyo na ku lumwesi, alimwi kuzwa ku bubotu bwa myoyo yesu kubelekela Leza. Ko cipa, Taata.

¹⁵⁴ Lino, koponya baciswa a bapengede abo baboola mu mundando wa mipailo. Akube kuti aba banyamuna maanza abo mujulu, mu myoyo yabo, beempwe, ndyoonya eno. Akube kuti abo balo baima kusule kwa ciindi cilamfu, beende cakufwambaana kuya ku maanzi a kuba aa kujatilwa kwa zibi zyabo ku Zina Iya Cituuzyo, Jesu Kristo, Mwana wa Leza. Amenii.

Kunselelo ku ciingano oko Mufutuli wangu
 nkwakafwida,
 Kunselelo kuya ku kusalazigwa zibi Nda
 kalila;
 Kuya ku moyo wangu Bulowa bwa kalambwa;
 Bulemu kuli Lyakwe. . .

Bulemu ku Zina Lyakwe!
 Oh, bulemu ku Zina Lyakwe!
 Oh, kuya ku moyo wangu Bulowa bwa
 kalambwa;
 Bulemu ku Zina Lyakwe!

Nda kafutulwa cakugambya loko kuzwa ku
 cibi, (Buti?)
 Jesu ula kkalilila cabubotu mukati,
 Kuya ku ciingano oko Nkwa. . .(Koba umwi
 Wakwe.) mukati;
 Oh, bulemu ku Zina Lyakwe!

Bulemu ku Zina Lyakwe!
 Bulemu ku Zina Lyakwe! (Zina liyandisi.)
 Oh, kuya . . . moyo Bulowa bwa kalambwa;
 Bulemu kuli Lyakwe . . .

¹⁵⁵ Sena eco taciciti cintu cimwi kuli ndinywe? Cila mulingula biyo cakumaninina. Bikka bulangizi muli ndinywe: Buumi, Buumi Butamani.

¹⁵⁶ Ino “kubambulwa a Kristo ninzi”? Nku ponena bamwi. Ino musyobonzi wa bamwi? Abo bamusula, abo banga taba muyandi, abo banga bamufubaazy: amu baponene; amube ambabo; amu bayande; “amu pailile abo bamu sampaula, kwaamba ziyanza zyoonse zya bubi bwabubeji, nkambo ka Zina Lyangu. Ba kapenzya basinsimi abo bakamu saangunina.”

¹⁵⁷ Ndali kuyeeya kuti mulumbe inga antela wagwasya mbungano cifumo cino, kuti inga mwabona kuteeti tu yandika Kalivari, tu yandika ku bambulwa.

¹⁵⁸ Lino ino cakacita nzi koonse? Ca ka bbadelelwa coonse. Mucizi mu wiluceya, ku bantu kuno bacisidwe a bapengede: Ca ka bbadelelwa coonse; cintu buyo nco mweelede kucita nku syoma kuti nci canu; amu citambule mu nzila njiyonya, nkabela muyo ponesegewa.

¹⁵⁹ Amuyeeye: Lino ino ncinzi? Nywebo inga mwaunka ku nyika, ku kambauka Makani mabotu, kuponya balwazi; a kupa kucitika kwa Buumi Butamani.

Mbu pati buti loko mbo cinga caba: ku, ngooyu muntu uukkede awa kaciswa i—i cikoto, kkulenge, kufumbwa mbo cibede. (Twaka Mu bona ziindi zinji loko kapa kucitika kwa zileleko Zyakwe a kuponya baalumi, kuponya banakazi; makumi a zyuulu zya zyuulu zya twaambo tutakonzyi kulubila koonse ku nyika, mwabona, baka bagwisya mu tulo, zyeenzyo; kukotela maningi buyo kwa bantu bakaligwa ku kkulenge cakumaninina; sunu, bali kabotu, bantu banseba zibotu.) “Eyi milimo Nje cita muyo icita ayalo; pele mipati loko kwiinda eyi muyo icita”: “minji kwiinda eyi,” ili luleme.

Inzi? Nda bapa kuyungizigwa kwa buumi, kwiinda mu Zina lya Jesu, ku yungizya buumi bwabo kwa mazuba masyoonto.

Pele, “Minji kwiinda eyi muyo cita: muyo bapa Buumi Butamani kwiinda mu Zina Lyangu.” Fyuu!

¹⁶⁰ Nkambonzi nco munga mwafwansoni ku Zina eelyo liyandisi? Nkambonzi bantu nco banga ba likaka a kuli yoowa? Ngu dyabolosi. Cili masimpe.

¹⁶¹ “Kweempwa a kujatilwa kwa zibi kweelede ku kambaukwe mu Zina Lyakwe ku nyika yoonse, kutalikila ku Jerusalema.” Mpaawo Mulumbe mpo wakasaanguna kumwaika. Mbo mbubo na? “Kweempwa a kujatilwa kwa zibi kuka kambaukwe mu Zina Lyakwe, kutalikila ku Jerusalema.”

162 Lino, kusaanguna, tuyo cita mbubonya Mbwa kacita: kuba a mupailo wa kuponya balwazi.

163 Cicilila, tu yooba a cipego cipati: I maanzi alibambidwe, kusule kuno, ku muntu uuli oonse uyanda kubapatizigwa (kuli zikobela mukati kuno zya banakzi, zikobela mukati kuno zya baalumi), kwiima cakuli bambila nkambo ka ndiywe kuti mu jatilwe zibi zyanu; nkaambo amuyeeye, kuti mukonzya buyo ku jatilwa zibi zyanu kweendelana ku lwiiyo lwa Bbaibbele. “Nkambo takukwe Zina limbi kungsi a Julu lipedwe aakati ka bantu, kwiinda omo mo mweelede kufutulwa.”

164 Paulo waka swaangana bamwi abo baka bapatizigwa kale. Elyo bakali koongolola, bakajisi luzundo. Wa kati, “Ino ndu baptizyo nzi lwanu?”

Ba kati, “Lwa Johane.”

Wa kati, “Johane waka bapatizya ku kweempwa.” Lino, amumvwe eci: ku kweempwa, kutali ku kujatilwa kwa zibi pe. Mbangaye bamvwisya eco? Kutali ku kujatilwa kwa zibi pe. Ba kabapatizigwa kabotu, ku kweempwa. Ba keempwa: “Iyi, munene, Nde empwa. Mebo, kusyoma kuti Ula boola.” Ba kabapatizigwa *ku kweempwa*; nko kwaamba kuti, “kusyoma aa Mwami Jesu Kristo.”

165 Mpawo cindi noba kamvwa *obu*, (kuti Cituuzyo caka boola kale), baka bapatizigwa alimwi, mu Zina lya Jesu Kristo. Elyo mpawo, kwa kabambwa kucitika kuli mbabo, cindi naka bikka maanza aali mbabo, Muuya Uusalala; elyo ba kaamba mu myaambo a kusinsima.

166 Lino, mbobuti mbo muyo cinca Lugwalo olo? Amu bikke tunwe twanu aa busena bomwe mu Bbaibbele awo kufumbwa bantu mpoba kasola kujatilwa zibi zyabo, mu Cizuminano Cipy, alimwi mpo bakasola kubapatizigwa mu nzila iili yoonse iimbi pele mu Zina lya Jesu Kristo.

167 Amu nditondezeye busena bomwe mu Bbaibbele awo kufumbwa muntu wakasola ku bapatizigwa mu Zina lya Taata, Mwana, Muuya Uusalala. Na kuleta ku desiki lyangu makani aakale, makani aakale aa mbungano ayo aatondezya busena muntu uuli oonse mpa kasola ku bapatizigwa mu Zina lya Taata, Mwana, a Muuya Uusalala, kusikila myaka iili mwaanda aimwi kuzwa ku lufu lwa muapostolo wa mamanino, cindi mbungano ya Katolika niyakaba kabunga.

168 Lino, Ndi jisi *Pre-Nicene Fathers*, alimwi i...boonse basimakani aakale, a zintu zyoonse, moonyu mu kaanda kangu ka kubalila: makani asetekene aakale, akalekale loko mu nyika; zitondezyo buyo zitakakilwi ezyo nzyo tujisi.

169 Amubale *Our Sunday Visitor*, na katikizimu ka mbungano ya Katolika, a ku zilangisya, eco nco zyaamba: “Bamwi ba Protestanti antela bayo futulwa, nkaambo kakuti bakotamina

Iwiiyo Iwa Katolika: Nkaambo Bbaibbele lyabo lilaamba, ‘bapatizya mu Zina Iya Jesu Kristo,’ pele twa gwisya bube bwa bulemu bwa ‘Zina Iya Jesu,’ a kuli bikka aali ‘Taata, Mwana, Muuya Uusalala,’ nkabela bala cizumina.”

Lino, amu nditondezye Lugwalo lukazya eco.

¹⁷⁰ Elyo nceeco we. Elyo nekubaboobo, nyika ila cikotamina. Nkaambonzi? Ta bana kusika ku Kalivari. Nce cico. Ta bana bona pe.

¹⁷¹ Bayo mufuubazya a ku mwiita . . . bayo mwiita akwalo kuti, “Babumbulusi basalala,” “Jesu buyo,” a mazina ayo oonse akwiindilizya nge bakonzya. Ino ndwaandano nzi nco cibamba obo mboba mwiita? Ino bakacita . . . Sa Wa kabikkila maanu kuli eco nco baka Mwiita? Wa kabambulwa. Wa kaponena Leza, alimwi Leza alikke. Elyo ikuti na Muuya nguwenya, wakali muli Nguwe, uli muli ndinywe, uyo mubamba kucita cintu nciconya: kuyumuna Zina Lyakwe. “Kufumbwa zintu nzo mucita” (mbo Iyaamba Bbaibbele) “mu ijwi na muncito, amu cicate coonse mu Zina Iya Jesu, kupa kulumbaizya kuli Leza.”

¹⁷² Mwiijana kuli njiisyo eyo ya buhedeni, ya butatu bwa buleza? Kuzwa ku katikizimu, kutali kuzwa mu Bbaibbele. I bbala “triniti” akwalo ta Iyaambidwe mu Magwalo oonse kuzwa ku Matalikilo kusika ku Ciyubunuzyo. Takukwe cintu cili boobo. Takukwe cintu cili boobo mbuli kaleza ka butatu bwa buleza. Ngu Leza, Leza alike, Leza omwe. Lyoonse wakali Leza omwe. Wa kabeleka mu milimo yotatwe: Wa kabeleka ciindi cimwi kali Taata, kubweendelezi bwa Musa. Wa kabeleka ciindi cimwi mu mubili wabuntu, mbuli Mwana, Jesu. Ula beleka eno mbuli Muuya Uusalala. Pele ngu Leza omwe. Leza omwe, kutali a mazina otatwe. Milimo yotatwe, mabande otatwe mu Zina Iyomwe: Jesu Kristo.

¹⁷³ Kufumbwa cintu ciindene mbuhedeni; alimwi Nda lomba muntu umwi kuti atondezye eco, na tacili mbubo. Mbo mbubo. Nda kaamba eco kwa myaka a myaka a myaka, nkabela kwiina muntu uuli oonse wazumina kuzundikizigwa, nekubaboobo (Mwabona?), nkaambo tacikonzyi kuba. Ndi jisi i . . . ndeeli Bbaibbele, kusaanguna; alimwi ngaayo makani aakale kale akutondezya eco kuti cili luleme ncobeni. Elyo nkamboonzi dyabulosi ncacita buyo . . . ? Mebo . . . Ee, Bbaibbele Iya kati bayooba mu cilengwa eco: “Mbobuti mbo bakonzya kuboola, citakuti Nda bakwela?” Oko kwamana nko Ndi zyi kwa ncico. Eco nceeco Jesu nca kaamba, aboobo . . .

¹⁷⁴ Ta ndaambi eci kuba . . . Ikuti na Nda amba eco, a kukambauka nkambauko mbuli eyi, inga Nda ba sikuupaupa uubaukide loko aakati kanu. Mbo mbubo. Nda amba eco nkaambo Cili Bwini alimwi Ngu Buumi. Mbuli boonse baka bapatizigwa muli Kristo, basama Kristo. Ba jisi Buumi, kwiinda ku Zina Lyakwe.

¹⁷⁵ Tula lomba mu Zina Lyakwe, yandaula mu Zina Lyakwe, kambauka mu Zina Lyakwe, bapatizya mu Zina Lyakwe, pona mu Zina Lyakwe, kufwa mu Zina Lyakwe, kuya ku Julu mu Zina Lyakwe, kubuka mu Zina Lyakwe. “Oonse mukwasyi ku Julu uulikidwe Jesu.” I Bbaibbele Iya kaamba obo: “Oonse mukwasyi aa nyika uulikidwe Jesu.” Wa kati, “Nda kaboola muli Lyangu. . .”

Yebo wati, “Ee, ndi Zina Iya Taata.”

Taata talili zina, mbubande biyo. Wa kati, “Nda kaboola mu Zina Iya Taata Wangu, nkabela tii mwaka Ndi tambula.” Lino, ino ndi Zina nzi Ndy a kaboolela mo? Uh-huh. Cili masimpe, “. . . nkabela tii mwaka Ndi tambula.”

¹⁷⁶ Aboobo nceeco we; cili buyo, inzya, cili sisidwe kuzwa ku meso aabo basongo a basimaanu. Masimpe, mbo cibede masimpe, uh-huh.

¹⁷⁷ Elyo kuya mu Ciyubunuzyo, mbuli mbo twa kayiisya buzuba bumwi: kuli mbungano sikuvuula mukulukulu, kali nkabungwe kataanzi; elyo mpawo waa kajisi nkamu ya bana basimbi abo bakazyalwa kuzwa kuli nguwe. Bala cita cintu nciconya, cilengwa nciconya. Boonse bagolela mu Babuloni, nzila yomwe, antoomwe. . . a mbungano ya Roma a nsangano ya mabungano ya—ya masi; nkabela ngaayo, oonse kaali mukugola, oonse mu cintu comwe, bwaato bomwe.

¹⁷⁸ Pele Mbungano ya Leza (Aleluya!), ni Mbungano yitidwe, yakandaanisigwa. Mbobuti Mbungano mbo iyakidwe? Mbo buti mbo muyooziba eci? Mbobuti mbo mukonzya kusola kuziba eci kuba Bwini? Cindi Leza aciyubununa kuli ndinywe. Mbobuti—mbobuti Abela mbwakaziba kuti kakali kabelele mu busena bwa maapeli? Ca kayubununwa kuli nguwe: “Ku lusyomo Abela wakatuulila Leza cituuzyo cibotu loko.”

¹⁷⁹ Kaba selemuka kuzwa ku Cilundu ca Kusandulwa, Jesu wakaamba, “Mebo bantu bandaamba kuti Ndimeni?”

Bamwi ba kati, “Eliasi,” “Musa,” a zintu zimwi.

Wa kati, “Pele Ndi buzya ndinywe, ‘Mebo mundaamba kuti Ndimeni?’”

Petro wa kati, “Nduwe Kristo, Mwana wa Leza muumi.”

¹⁸⁰ Wa kati, “Yebo tii wakaiya eci. . .” Mu nzila imbi (Nda amba eci, kutali kuba mulemu, pele kwaambilisya kaambo kapati): “Yebo tii wakaiya eci mu seminari imwi; bantu bamwi tii bakasola ku kuyiisya eci; pele Taata Wangu, uuli ku Julu, wacyubununa eci kuli nduwe: kuti ndime UULIWO (kutali Taata, Mwana, a Muuya Uusalala, pele, Ndime Jesu Kristo). Elyo aatala aa mwaala oyu (Ino mwaala nzi? I umwi nguonya Abela nkwa kainka; aatala aa mwaala nguwenya.), aatala aa mwaala oyu, Bwini bwa Leza bwaka yubununwa kumuuya, Njo yaka

Mbungano Yangu, a milyango ya gehena taikonzyi kwiizunda.” Mbo mbubo. Bala cisola, pele taba konzyi kuzunda. Mwabona?

¹⁸¹ Aboobo kamuya buyo ku Kalivari, mu kabambulwe, a kujoka, a kusala nzila ya basampaulwa basyoonto iba Mwami, ku zumanana.

¹⁸² Lino, Mwami, tuli mukutuula zintu zyoonse kuli Nduwe. Ta ndizi, kuzwa mu nkamu eyi, eyo iili mukati kuno. Ta ndikwe muzeezo wa kuziba, Mwami, citakuti Wa ci yubununa. Elyo eno, Taata Leza, Ta ndili mukulomba Nduwe kuti ucicite. Nda zwaa kucibikka biyo ku mulimo wa bantu. Mbaabo we. Akube kuti oku kube Kalivari ya kasimpe cifumo cino; akube kubambulwa kwini ku bukanze aa kuliyandila kwa buntu, a ku kuyandisiya kwa buntu, a zintu zipati zya buumi.

¹⁸³ Akube kuti bantu balibombye, a kulibambila kusala nzila ya basampaulwa basyoonto iba Mwami. Akube kuti beende cakulibombya. Akube kuti bazyalwe mu Bwami obu, obu Bwami bupati ibwa Leza, uuli mubili wa kumuuya, mubili wakujulu wa Kristo uuli aans: “Kwiinda ku Muuya omwe toonse twaka bapatizigwa mu mubili omwe.”

¹⁸⁴ Ko cipa, Mwami. Nebaba bantu basiya, bakuwa, bayello, basalaluka, kufumbwa mbo babede, mwaalumi na mwanakazi, baange a balubusi: toonse twa kabambwa kunywa ku Muuya omwe buyo.

¹⁸⁵ Ko cipa, Taata, alimwi acibe a . . . aakati ka banji, cifumo cino, kuti bayo mvwisya; akube kuti Yebo ujule kumvwisya kwabo. Mpawo, ciyo ba mbuli buzuba bupya kuli mbabo: izuba liyo bala, a mumuni uusiyasiya wa lwiyo lwa ziyabukombi lwakabambwa aa bantu luyoozwa, nkabela Mumuni wa Leza uyo bala mu kazila kabo, a kumwya cisitilizyo eco cisinkila mu Mumuni oyu mubotu. Elyo inga beenda mu mugwagwa mupati wa busalali, mpawo, kuponena bamwi, mbuli Kristo mbwa kacita.

¹⁸⁶ Lino mbuli mbo tunjizya mundando wa mipailo, Nda lomba kuti Uyo nanika bazike Bako cifumo cino, toonse swebo, mbuli mbo tu kombelana, umwi aumwi. Elyo kopa, sunu, kuti balwazi boonse abo baboola kwiinda mu mundando oyu wa mipailo kuti baponesege. Akube kuti bajoke, mbuli musimbi muniini wa mancenga, a mulombe muniini, a i . . . a mulindu oyo wacipati, a—a Mukwesu Wright, a banji abo baboola kwiinda mo, Mwami, bajisi mapenzi a malwazi a cintu cimwi eco bamadokota nco batakonzyi kusilika; alimwi mbaaba sunu (kutandila biyo mvwiki yainda), alimwi mbaaba, kabali kabotu, sunu.

¹⁸⁷ Leza, akube kuti baalumi a banakazi baina mo a lusyomo ndulonya, kuziba kuti baya ku Kalivari kuti bakabambule mizeezo yabo a makanze aabo kuti ba “kaponesegwa kale.” Akube kuti nguzu ezyo zyakabusya Jesu kuzwa ku cuumbwe zibape buumi, buumi bubotu bwa lusyomo.

188 Elyo mpawo, ndyoonya kwamana eci, akube kuti banji baboole ku ciziba ca lubapatizyo. Twa lomba, mu Zina Iya Jesu. Amen.

189 Lino, tu jisi biyo mamimiti aali makumi obile kweendelezya mundando wa mipailo a mulimo wa lubapatizyo. Lino ta tujisi makkadi aa mipailo. Twa zwa kuli eco, nkabela tuyo sola kucibeleka mu miswaangano yangu mipati loko kufumbwa ciindi twa kutalika. Nda mwaambila nyoonse, twa cibamba kubusena, twa cibikka aa teepu, alimwi kufumbwa nko Ndiya, alo mateepu ayo tumwa aambe.

190 I citondezyo citondezya biyo ku cilongezyo. I muzeezo wali kuti, “Ikuti na uyo kombela balwazi, kababambe kuti baka kusyome.”

Nda kati, “Inga taba kandi syomi pe.”

Wa kati, “Uyo pegwa zitondezyo ezi, alimwi kwiinda kuli ezi bayo kusyoma.” I zitondezyo zya zyunguluka koonse, kwa myaka iili makumi koonse ku nyika, kakutakwe ciindi comwe kukakilwa. Kwiina kukakilwa, no kuceya, muli ncico. Mbangaye bazi eco kuba bwini?

191 Ee, ikuti na inga mwasyoma citondezyo, nkokuti amuu syome Mulumbe. Mbo mbubo. Cila utondezya. Elyo sa Leza inga wabikka Mulumbe muli ndime (Elyo kuu lekela kulondoka loko mbuli obo, pele eco. . .) elyo Nda mwaambila cintu cimwi kuti inga caba ca bubeji? Leza takondilekela kucita eco. Peepe, peepe. Peepe, munene. Ndi mwaambila Bwini.

192 Lino, nywebo nyoonse no muyanda ku kombelwa, ku baanga, aa mundando oyu awa, ababoole kuya ku lubazu olu, ikuti na inga mwacita, kubusena kuya, mube mu mundando kululyo. Elyo mpawo ciyo lekela bantu kuboola kwiinda mo mbuli mbo tukomba. Mpawo tuyo jana i—i balombe, maasha a balo bano langilila; alimwi mbuli mbo kuboola kwiinda mo kuno, mpawo kuya ku lubazu olu, tuyo baleta kuzungulika kusule, a ku baleta kwiinda muli nguwo. Bantu boonse kuti bakombelwe.

193 [Muntu umwi waambaula ku Mukwesu Branham—Mul.] Oh, peepe, pe, Tii ndacita. Ee, kufumbwa ciindi nco yanda. Tacikwe makani. Inga wa muleta, na yebo. . . Inga nda. . . muleta kubusena kuya eno, na kwamana kaindi kaniini, kufumbwa ciindi nca yanda, tacikwe makani.

194 Lino, atube a batontozi buyo mbuli mbo tukonzya, kwa maminiti masyoonto aya aacilila. Ndi yanda kuti kamu yeeya eno: Lino, ino—ino Bbaibbele Iya kaamba nzi? “I kukomba kwa lusyomo kuyo vuna mulwazi.” Mbangaye bazi kuti eco cili luleme? Mbangaye bazi kuti Bbaibbele Iya kaamba, “Ezi zitondezyo ziyo batobela abo basyoma. I milimo Nje cita muyo icita ayalo”? Elyo ino milimo yakali nzi? Wa kati, “Nda konzya kuti na mwasyoma kuti inga Nda cita eci.” Sa mbo mbubo?

Wali mubuzyo nzi wangu? “Ta baka ndisyomi.”

Wa kati, “Ezi zitondezyo ziyo bapa kusyoma.”

¹⁹⁵ Lino, ikuti na mula syoma, amu libambile: Eli ndi oora lyanu lya kwaanguluka. Mbubonya buyo mbo cinga caba kuzwa ku cibi, ncisyomezyo nciconya ca Leza nguwenya.

¹⁹⁶ Lino, tu jisi mwanakazi, muniini uucisidwe awa, oyo uujisi penzi lya mwida, uzwa ku musanza mu New Albany. Tuyo mukombela, lutaanzi, kutegwa aajane cakwe—aajane cuono cakwe. Lino, mubutontozi, nkabela bantu boonse, eno. Ndi yanda bakwesu kuti bandigwasye, kuno. Alimwi atu kotamike mitwe yesu kwa kaindi kaniini, eno, ku mupailo.

¹⁹⁷ Lino, Taata Wakujulu, eeli lyali Ijwi Lyako. Ta ndikwe mulimo wakuvwiilila micito eyo iiyobikkwa aali ncico, pele Ndi jisi mulimo wa kuli kambauka. Elyo kuziba eci (alimwi kuziba kuti Ndili mwaalumi eno wa myaka yakukomena yaakati, elyo buzuba bumwi ndeelede kuyo Ku langanya): Nda kambauka Bwini kuzwa ku moyo wangu. Yebo uli cizyi. Kutali kubetekela limwi kwabuyo, ikuti nicali boobo, Mwami, nkokuti Nde elede kweempwa.

¹⁹⁸ Elyo Taata, Nda lomba kuti Uyo gwasya, eno, mbuli mbo tuya ku kukombela balwazi, akube kuti mipailo yangu ivwiilwe, kutali buyo mipailo yangu, Mwami, mupailo wa mbungano eyi, mbuli bantu aba bacete. . . Ino kuti nali mukaintu wangu kaimvwi awa? Ino kuti oyu wali nguwe, kakkede mu wiluceya? Na mucizi wangu? Baama bangu? Oh, Leza, koponya bantu aba. Sa Ula cicita, Mwami?

¹⁹⁹ Amulange, baimvwi mu mundando oyu wa mipailo: penzi lya moyo, kkulenge, cikotu, misyobo yoonse ya malwazi a mapenzi. Bunji bwabo baboola (bali myaanda bali mukuponesegwa, mponya awa eno, Mwami), elyo bala cibona, nkabela bala cisyoma, nkabela bali mukuboola mu mundando wa mipailo kutambula zyabo. Bali mukuboola eno ku Bbwe lizwide kubotelwa lyuumi, kutali mulanda Wako, pele ku Mwana Wako, Jesu, Oyo uuli ngo Musololi wa Mbungano, Muntu, wa nguzu zya kumuuya zitamvwiki aakati kesu. Elyo mbuli mbo tuunka, kutuula Zina Lyakwe (Wa kati, “Mu Zina Lyangu bayo tanda badyabulosi.”), Nda lomba kuti Uyo vwiila mipailo yesu, mu Zina lya Jesu. Amenii.

²⁰⁰ Lino, bantu boonse mu mipailo. Lino, eci ncibeele canu, anywebo. Eyi mipailo yanu.

Lino oyu mwanakazi muniini weelede kufwa, ikuti na Cintu cimwi taci mugwasyi.

²⁰¹ Mbangaeye bazi Mukwesu Stadskev? Mukwesu a Mucizi Stadskev? Nda kaitwa kuzwa ku Germany ziindi zyoatatwe busiku bumwi; muvwanda wabo wakafwa. Ba kalomba, “Mukwesu Branham, twa ka kubona, kwiinda ku Muuya wa

Leza, kubusya bafwide,” (Ba kaima kabaliko a ku cilangilila. Mwabona?) “alimwi tuli kuzi yebo kuba musinsimi wa Mwami. Koamba biyo Ijwi.”

Nda kati, “Ta ndikonzyi ku caamba, citakuti wa cibikka mu mulomo wangu.”

“Koboola ku Germany.” Nda kanyamuka cakufwambaana. Elyo ba tuma luwaile: “Kotanta ndeke eyo ikonzya kukuleta ku Germany mu maora aali cisambomwe.” I ndeke ya basilumamba ya keelede ku nduulusya kuya ku Germany kuyo busya muvwanda wakafwide. I ndeke ya basilumamba ya keelede kundilota kuya mu maora aali cisambomwe, kuzwa ku Louisville kusika ku München, Germany.

²⁰² Nda kanjila muya, nkabela ndaka fugama ku mazwi aangu, elyo Nda kati, “Taata, Nde elede kucita nzi? Koambaula mu mulomo wangu.” Taakwe na kandivwiila. Nda kazwa kuya musokwe, Nda kati, “Taata, Nde elede kwaamba nzi? Kobikka majwi mu mulomo wangu. Njo unka mubuyo, kwataba boobo.” Nda kajoka, taakwe Na kandivwiila. Nda ka njila. Busiku boonse Nda kakomba, “Mwami, kobikka majwi mu mulomo wangu.” Taakwe caka vwiilwa.

²⁰³ Cifumo cakacilila mukaintu wangu wakabuka. Mbwaka zwida buyo, Ijwi (Nda kaima), Wa kati, “Uta tapatili eci. Eeli ndi janza lya Mwami.” Uh-huh.

Mpawo cakufwambaana ku luwaile: “Ta ndikonzyi kubooola. Peepe, eeli ndi janza lya Mwami. Nda kasigwa.” Mwabona ikuti ni nguzu nzi zili aa kutapatilwa oko? Cindi Leza na kati, “Uta citi eco, nkambo ndi janza lya Mwami.”

²⁰⁴ Lino, Musa, ciindi cimwi, wakaambilwa kuta cita cintu cimwi, wakaunka a kucicita nekuba. Nywebo mula yeeya? Aboobo Tee—Tee ndakainka.

²⁰⁵ Elyo inga Nda leta twaambo ku mutondezya bantu bali bone bandeene, abo, bakaambwa camulao kuti bali fwide a madokotela, kumane mupailo a kutapatila lufu. Mwabona? Tu laima mukati muya kutapatila cintu eco. Elyo ikuti na Leza wakakupa nguzu kucita cintu cimwi, ncibotu wacenjele kuli eco ncoli mukucita. Mwabona? Ncibotu wacenje-. . . Wa kati, “Uta. . .”

²⁰⁶ Lino, amuyeeye, eco inga tii catondezya kuli ndinywe kwini maningi, pele kuli ndime, ca kaamba cintu cimwi. Mwabona?

“Utapatili eci.” Kabotu ncobeni, Jwi lyabuuya (kutandila sikisi-theeti, Nda syoma mbo cakabede, sikisi-theeti cifumo eco) kati, “Utapatili eci. Eeli ndi janza lya Mwami.”

Nda kati, “Nda kulumba, Taata. Nda kulumba, Mwami. Nse kaciciti pe.”

²⁰⁷ Ikuti Nda kati, “Kotapatila eci. Oyu ngu sinkondo wasobelela kunjila mukati.”

Inga ni ndakati, “A tweende.” Nkabela nocaka citwa.

208 Cindi oyo mulombe muniini kuya mu Finlanda nakalede awo, kafwide, kavwinyaudwe, kutali akwalo cifuwa cibotu cakali mu mubili wakwe, Mwami wa kati eelyo lyakali janza lya Saatani, kati, “Ko citapatila.”

209 Elyo Nda kati, “Lufu, tokonzyi kumu kasya. Ko mujosya, ko mwaangulula.” Awo, wakasotoka ku matende aakwe, kali kabotu, taakwe akwalo cifuwa cakatyokede mu mubili wakwe. Eelyo ndi Ijwi lya Mwami. Ta ndikonzyi kubelesya Ijwi lya Mwami kusikila Ijwi lya Mwami lya ndinjila.

210 Pele mu Lugwalo, Ijwi lya Mwami lya ndipa mulimo wa ku kombela bantu aba baciswa; ku kupa mulimo wa kuba kombela. Lino, “kukomba kwa lusyomo kuyo vuna mulwazi;” atu kombe, amu kotamike mitwe yanu; tula bona eco Nca taambe, mbuli mbo mwiinda mo.

211 Yebo uli Munakristo, embo na? Yebo ula syoma amoyo wako oonse kuti Jesu uyo kubamba kuba kabotu? Ujisi penzi liniini lya mwida; waciswa a ndilyo kwa myaka, mucizi. Lino, ulaba kabotu, ikuti na ula syoma.

212 Lino, Mwami Leza, oyu mwanakazi mukubusyi weelede kufwa citakuti Yebo wamu gwasya. Lino Nda lombamba, mbuli mbo Nda mulanga, Ta ndibwene kaambo kuli nguwe ka kuti afwe.

Elyo Nda limvwa mu muuya wangu, Mwami, kuti mbukanze Bwa kuzumizigwa, eno, kuti Ndi tapatile eci: Saatani, ko mwaangulula!

Mu Zina lya Jesu Kristo, akube kuti abe kabotu, akuboola ku cikombelo eci, a kupa bumboni ku bulemu bwa Leza. Amen.

213 Lino, mbuli mubuteteete mbuli mbocibede, mulindu, uyooba kabotu. Sena ula syoma eco mukwesu?

[Mukwesu Branham wazwa ku maikrofooni—Mul.] Sena ula syoma aansi awa, kuti uyooba kabotu?

Koya eno, talika kulya kufumbwa eco nco. . . mpawo uyooba, kabotu.

Lino, yebo ulangila kupa nyika kulebuka, a kwilebula; ya kakupa kulebuka, nkabela ilakulebula. Lino, Leza wa Julu oyo uugwisya kulebuka Kwakwe kuzwa ku nyika kuti ape kujatilwa kwa zibi, kwiinda ku Zina ndilyonya, inga wakupa kujatilwa kwa zibi, ku gwisya kulebuka kuzwa kuli nduwe, a ku kubamba kuba kabotu.

Ulasyoma kuti inga Wa bamba kuduntaana kwa moyo wako kuba kabotu na? Ula cita eco, ulaba kabotu. . . ? . . .

214 Mwami Jesu, mwanakazi oyu mucete weelede kulala mu cuuno eci buumi bwakwe busyeede a kwalo, kanoo bwezwa. Pele tula lombamba kuti inguzu ezi zya Saatani zigwisigwe kuli nguwe.

Akube kuti apone a kweenda a kuba bweelede mbuli mbwa kali lyoonse. Twa cilomba mu Zina Iya Jesu. Amen.

215 Ula syoma na? Ngu mulimo uumanide, ca citwa. Ino ndi penzi nzi? Kakutakwe buyoofu, kakutakwe ku...Sa tii cakali...? Wa kaponesegwa ku kkulenge ciindi cimwi...?... Koanguluka, kopa zintu zyoonse kuli Jesu.

216 Mwami Jesu, Nda bikka maanza aangu aa mwanakazi oyu a kutapatila bulwazi bwakwe. Ndi lizi ngu Munakristo, wakazyalwa a Muuya. Nda cigwisya kuzwa kuli nguwe, mu Zina Iya Jesu Kristo wa Zina bbotu loko. Amen.

217 Mwami Leza, nkambo ka munyina wakwe muyandisi, Nda lombela lufutuko lwakwe mu Zina Iya Jesu. Koima ali eco. Amen. Ciyo citwa.

218 Sa uli libambilide kutambula kuponesegwa kwako, mulombe? Ncibotu, cazumanana kuya ku janza Lyakwe.

219 Mwami Jesu, aa mwaalumi oyu mukubusyi, oyo waamba, kuzwa kuli Nduwe, ula komba kuti atambule kuponesegwa kwakwe. Mbuli mulanda Wako, Nda bikka maanza angu aali nguwe mu Zina Iya Jesu Kristo...?... Amen.

Lino, kufumbwa buyo...?..eno, koita biyo ku Zina Lyakwe. Lino, kutali—kutali kuli ndime...?...

220 Taata Leza, mbuli buyo mwana oyo wa kayeeme ku camba ca banyina, waa kaumauma aali nguwe alimwi—alimwi kakomba a nguwe a kujata janza lyakwe liniini cindi nakali muvwanda uung’ung’una cabuuya. Lino, Saatani wamubikka mu kabunga kalanganya zya banyongene kuyeeya. Leza, waboola ku Mbungano iisalala ya Leza muumi, Mbungano eyo iizyedwe ku Muuya wa Leza, Mbungano eyo Muuya wa Leza moukkala, a kulizibya Mwini. Elyo sunu, ku mupailo, twaa ngulula mwanakazi oyo kuzwa ku kabunga ako. Mu Zina Iya Jesu Kristo, twa lomba. Amen.

Koya ku muunzi, uli kabotu.

Nda kulumba ku kuboola, kulombela banyoko; oyo mwana ncobeni.

221 Obu mbo buzuba bwa kwaanguluka kwako. Mwami Jesu, nkambo ka mwanakazi oyu mukubusyi, nkambo ka lufutuko lwa mulumi wakwe a kwaanguluka kwa kameneno kakwe, ndalombozya a citambule mu Zina Iya Jesu Kristo, Oyo waamba ku “boola, kucisyoma eno,” alimwi cipange cimanide.

222 Mwami, bamadokota ba kaamba, Mwami, cili mu mubili wakwe, kuboola mu liso lyakwe. Waa boola kuti angululwe, kutala aa cipailio eci, mbuli Mbungano eyi iisalala mboikomba, Nda lomba kwaangululwa kwakwe mu Zina Iya Jesu Kristo, eco cuumo ciyoozwa mu mubili wakwe. Ngu mulimo uumanide.

Nkambo ka mwana wakwe, Nda leleka katambala aaka. Akube kuti kumvwa a ziimo zibotu zijoke ku kutwi kwakwe...?...

²²³ Lino Mbungano yaamba; eno Mbungano iili Mubili wa nguzu zya kumuuya zitamvwiki iwa Kristo. Toonse tula kukombela. Mwabona? Ta twa—ta twa ambi kuba limbi mu nyika. Ta twaambauli makani aa kuyeeya oko nko tuya. Twa kaijana nzila. Twa kazyalilwa ku nzila eyo. Tuli Mbungano ya Leza muumi (cibeela cayo); mubwini, ili mwaikide koonse ku nyika. Pele eyi ni nkamu ya mbabo. Sunu, antoomwe twa boola mu Zina Lyakwe. Twa boola kucita eci Nca kaamba, kucita. Eco Nca takonzyi kuyubununa cindi twa boola antoomwe. Amukombele baciswa, amubikke maanza aali mbabo, “kukomba kwa lusyomo kuyo vuna mulwazi.”

²²⁴ Akube kuti penzi lya moyo likuleke. Mu Zina lya Jesu Kristo, Nda swiilila kutumwa Leza nkwa kandipa...?...



OBUYA BUZUBA AA KALIVARI TNG60-0925
(That Day On Calvary)

Oyu Mulumbe aa Mukwesu William Marrion Branham, wakakambaukwa lutaanzi mu Chikuwa Munsondo kuseeni, Itwi 25, 1960, ku Branham Tabernacle mu Jeffersonville, Indiana, U.S.A., wa kagu sigwa kuzwa ku rekordi yamagnetiki teepu a kulembwa cakutagwisyacintu mu Chikuwa. Obo busanduluzi bwamu Chitonga bwa kalembwa a kumwaisigwa aa Voice Of God Recordings.

CHITONGA

©2017 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Kuzibya Kwa Nguzu Zyakkopi

Nguzu zyoonse zilitaminidwe. Eli bbuku inga lyalembwa ku purinta yaku ng'anda ku kubelesya kwamuntu na kuvozegwa, kakutakwe kubbadelesya, mbuli cibelesyo ca kumwaisya Makani mabotu aa Jesu Kristo. Eli bbuku talikonzyi kusambalwa, kulembululwa muciiimo cipati, kubikwa aa webbusaiti, kuyobolwa mu ciyanza cakujokolosya, kusandululwa mu misyobo iimbi, na kubeleseghwa kulomba lugwasyo lwa mali kakutakwe kuzumizigwa kulembedwe kwabumboni aa Voice Of God Recordings®.

Ku makani aamba na cakubelesya cimbi ciliko, walombwa kukwaba ku:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org